

Okushwekuurwa

kw'Obusingye Mushanju bw'Ekanisa

Eshuura ya Mukaaga

Obusingye Bw'Ekanisa Ya Suatira

Okushuuruurwa 2:18-29

Handiikira maraika w'ekanisa ey'omuri Suatira, oti: Ebi nibyo bigambo by'Omwana wa Ruhanga, Oine amaisho agari nk'endimi z'omuriro, n'ebigyere Bye biri nk'omuringa ogurikwengyenyeta.

Naagira ati: Nimmanya emirimo yaawe, n'okukunda kwawe n'okwikiriza n'okuheereza n'okugumisiriza kwawe, kandi nimmanya ngu emirimo yaawe eya bwanyima neekira ey'okubanza.

Kwonka Nyine eki ndikufa naiwe; ogumisiriza omukazi Yezebeeli, orikweyeta nabikazi, kandi oyegyesa abahuuku Bangye, akabahabya ngu bashambane, kandi ngu barye ebitambiirwe ebishushani.

Nkamuha omwanya gw'okweteisa; kwonka yaayanga kweteisa obushambani bwe.

Reeba, Niinyija kumunaga aha kitabo n'abashambane be omu kubonabona kwingi, ku baraabe bateeteisize by'emicwe ye;

Kandi n'abaana be Ndyabaita rufu; amakanisa goona garyamanya ngu Niinye ocaaka emitima n'emyoyo; kandi Ndyazimuurira omuntu weena omurimwe ebishemereire ebi yaakozire.

Kwonka imwe ab'omuri Suatira abatsigaire mutaikiriize nyegyesa egyo, abatarikumanya bi abandi beeta enaama za Sitaane, Nimbagambira ku ntarikubakorera gundi mutwaro;

Kwonka muhamye eki mwine okuhitsya obu Ndiija.

Orikusingura, akaguma naakora emirimo Yangye okuhitsya aha muheru, Ndyamuha obutegyeki aha mahanga goona,

Kandi aryabategyeka n'enkoni y'ekyoma, nk'oku omuntu ayatagura enyabya z'eibumba, Nkaanye oku naahairwe Tata obutegyeki;

Kandi Ndyamuha enyonyoozi y'obusheeshe.

Oine amatu, ahurire ebi Omwoyo arikugambira amakanisa.

SUATIRA

Omu byafaayo, orurembo rwa Suatira rukaba nirukirayo kuba rukye omu ndembo mushanju zoonza ez'omu kitabo ky'Okushuuruurwa. Rukaba nirushangwa aha nsharo ya Mysia na Ionia. Rukaba rwetooroirwe emigyera mingi, kwonka emigyera egyo ekaba eijwiremu emishundwe erikunyuunyuta eshagama. Ekyabaire nikikirayo kurusiimisa kikaba kiri ngu rukaba ruri gye omu by'esente ahabw'ebibiina by'okukorera hamwe eby'ababumbi, abahazi b'empu, abaruki b'emyenda, abateezi b'erangi, abakozi b'emyenda n'ebindi. Omu rurembo oru nimwo Lydia, omushubuzi w'emyenda ya bujwa, yaabaire naaruga. Omukazi ogu niwe yaabaire omwikiriza w'okubanza wa Paulo omuri Buraaya.

Hati enshonga eyaatumire Omwoyo yaatoorana orurembo oru nk'orwo orwaherize kutunga ebintu by'omwoyo ahabw'obusingye bwa kana n'ahabw'ediini jaarwo. Ediini nkuru ya Suatira ekaba eri okuramya Apollo Tyrimnaios owaabaire ayegaitisire n'ekibiina ky'ediini y'ekikwangara ekyabaire nikiramya omugabe. Apollo akaba ari ruhanga w'eizooba, kandi owa kabiri mu bushoboorozi ahari ishe, Zeus. Akaba naamanywa "nk'orikwihaho emikyeeeno"; akaba akurira ebiragiyo by'ediini n'okufubira enkozi z'ebibi (oburyo bw'okurihiirira ebibi, okusaasira ebicumuro nari orubanja). Plato akamugambaho ati, "Ashoboororera abantu enkora ya zaahekalu, ebitambo kandi n'okuheereza baaruhanga, otagambire emigyenzo eine akakwate n'okufa kandi n'ahanyima y'okufa." Akaba amanyisa ebi yaabaire naamanya "eby'ebiro by'omu maisho" kandi "n'okukunda kwa ishe" aha bantu kurabira omuri baanabi n'endagu. Omuri Suatira omugyenzo ogu gukaba nigwebemberwa nabikazi owaabaire ashutama aha ntebe y'amaguru ashatu atyo areeta obutumwa obwo atembirwe omwoyo gw'emandwa.

Okuhama kw'ediini egi kukaba nikutangaaza. Obushoboorozi oburikutiinisa bw'ediini egi bukaba butari omu by'enaama byonka, kureka bukaba buri omu kugira ngu tihariho n'omwe owaakubaasize kuba omu bibiina by'okukorera hamwe ebyabaire nibiha abantu eky'okubabaisaho shana baamanywa nk'abarukuramiza omuri hekalu ya Apollo. Weena owaabaire ayanga kwegaita aha magyenyi g'okuramya ebishushani n'amagyenyi g'eb'okweshemeza akaba azibirwa omu kweteerana oku okw'ekyasha ky'okubanza. Okwenda kutuura amagara g'okukwatanisa n'abantu kandi n'ag'eb'obushubuzi omuntu akaba naateekwa kuba naata omu nkora obukaafiiri bw'okuramya ebishushani.

Kishemereire kumanywa kurungi ku eiziina eryo Suatira ririkumanyisa "Omukazi Kutegyeka." N'ahabw'ekyo

obusingye obu burimu amaani agarikutegyeka, amaani agarikutaahirira byona n'obuhaze gataine mbabazi, gakasingura byona kandi gakategyekyesa obwa ngambanyenka. Hati omukazi orikutegyeka nigwo mukyeeno ogurikukirayo omu nsi. Omushaija owaakirizeyo kugira obwengye ou ensi eraboine akaba ari Sulemaani, kandi akagira ati, "Bwanyima naahinduka, naamariirira omu mutima gwangye kumanya, kucondooza, kusherura obwengye, kwehanuza ebintu, n'okumanya obubi bw'obushema, n'obushema oku buri eiraro. Naagaruka naareeba EKINTU EKIRIKUKIRA RUFU OBUSHAARIZI, NIWE MUKAZI ou omutima gwe guri omutege n'ekigoye, kandi n'emikono ye eri enkomo. Orikushemeza Ruhanga niwe arimukira; kwonka OMUSIISI, ogwo mukazi aryamukwata. Omubuurizi yaagaruka yaagira ati: Reeba, eki nikyo naaboine, ahabw'okuteerana ekintu n'ekindi, ngu ndeebe oku birikwingana, eki omutima gwangye gusherwire kaingi, kwonka eki ntakareebire. Omu bashaija rukumi nkareebamu omwe, kwonka omu bakazi boona tindaboinemu n'omwe." Omubuurizi 7:25-28. Paulo akagira ati, "Tindikwikiriza mukazi kubuurira nari KUTEGYEKA." Okuruga omu Kibanja kya Edeni n'okugumizamu, omukazi buriijo agyereizeho kimwe kutegyeka omushaija, kandi ebiro ebi byonyini n'ensi y'omukazi obwo ruhangakazi wa Amerika ari omukazi ojwaire busha. Nk'ekishushani ekirikuramibwa ky'omukazi kirikugwa nikiruga omu mwanya ahaiguru (ijuka emikono yaakyo ekaba eri ey'ekyoma) kyabaire nikyoreka emitwarize y'Obusingye bw'okubanza nari Obusingye bwa Efeso, nikwo n'amaani ge geeyongyeire okuhitsya obu atungire obushoboorozi bwona, obushoboorozi obwo nibukoresibwa emitwarize ye egumire nk'ekyoma.

Hati omukazi tashemereire kugira emitwarize egumire nk'ekyoma. Omukazi, nk'oku Ebyahandiikirwe Ebirikwera bigira, ashemereire kworobera omushaija. Eki omukazi akakiragiirwa. Omukazi ny'eikazi, ori omukazi buzima, naija kuba atyo. Ti kakyeeka k'aha muryango. Tihariho mushaija muzima orikuhindura omukazi akakyeeka k'aha muryango. Kwonka naija kukunda kuba ahansi y'obushoboorozi kutari kutegyeka omushaija, ahakuba omushaija niwe mutwe gw'eka. Omukazi ku araahende ekyo kishushani eki Ruhanga yaamuhangiire, naaba asiisikaire. Omushaija weena orikureka omukazi akategyeka nawe naaba ahenzire ekishushani ekyo kandi naaba asiisikaire. Egyo niyo nshonga ahabw'enki omukazi ATARIKUBAASA KUJWARA KISHAIJA NARI KUSHARA EISHOKYE RYE. Tarikwikirizibwa kujwara kishaija nari kushara eishokye rye. Ku akikora aba ataahiriire omwanya gw'omushaija atwairere obushoboorozi kandi omu buryo obwo aba ayesisire. Kandi omukazi ku ataahirira ekituuti eki ARAGIIRWE KUTAKORA, aba naayoreka omwoyo oguri omuriwe. Okuba omukazi orikutegyeka ni antikristo kandi embibo z'Ekanisa Enkaturika ya Rooma ziri omu mukazi ogwo n'obu eki yaakukyehakana munonga ata. Kwonka KYAHIKA AHA KIGAMBO, Ruhanga k'abe ow'amazima kandi omuntu weena abe omunyabishuba. Amiina.

Ka tugarukye omu kutandika. Omu kuhangwa kw'ebintu ebirikureebwa kandi bikabaasa kukwatwaho n'engaro okwabandize nk'oku turikukumanya ebiro ebi, Ruhanga akahanga ebintu byona bibiri bibiri, ekishaija n'ekikazi. Hakaba hariho enkoko ibiri - enshaaki n'enkoko-kazi. Hakaba hariho ente ibiri, ente n'enumi. N'okugumizamu batyo. Kwonka ku kyahikire aha muntu, akaba ari omwe wenka. Bakaba batari babiri. Adamu akaba ahangirwe omu kishushani kya Ruhanga. Akaba ari omwana wa Ruhanga. Nk'omwana wa Ruhanga akaba atarikubaasa kwohibwa akagwa. Ekwo kikaba kitarikubaasika. N'ahabw'ekyo Ruhanga akakoresa eki yaihire omu mushaija kureetaho okugwa. Omukazi tararugire omu ngaro za Ruhanga butsimba nk'ekihangirwe ky'amazima kya Ruhanga. Akaihwaga omu mushaija. Kandi Ruhanga ku yaamwihire omu mushaija akaba ari ow'omutaano munonga aha bindi bikazi ebi Yaahangire. Akaba naabaasa kubehwabeihwa. Tihariho kindi kikazi omu bihangirwe ekirikubaasa kuba ekishambani; kwonka omukazi naabaasa kukozeesibwa eby'omubonano haihi obwire bwona. Kandi obweremwa obwo omuriwe nibwo bwareeteire Sitaane kurabira omu njoka kumushendashenda, kandi kitaire omukazi omu mwanya oguhindukiire kimwe omu maisho ga Ruhanga n'Ekigambo Kye. Omukazi n'ekirikushushanisa ebintu byona by'emicwe mibi, obubi, n'okunugwa aha rubaju rumwe, kandi aha rubaju orundi n'ekirikushushanisa ebintu byona ebishemereire kandi ebirungi, n'ebirikwera nk'obutaaho bw'Omwoyo n'emigisha ya Ruhanga. Aha rubaju rumwe omukazi naayetwa maraaya osinzire viinyo y'obushambani bwe. Aha rundi rubaju naayetwa Omugore wa Kristo. Aha rubaju rumwe omukazi naayetwa Babulooni y'Omubonano, ekihagaro omu maisho ga Ruhanga; kandi aha rundi rubaju naayetwa Yerusaalemu Ensyaa, maaweitwe. Aha rubaju rumwe omukazi aijwire obubi n'okusiisikara, n'obushambani burengyesereize okuhitsya obu arikuhendera naanagwa omu nyanja y'omuriro nk'omwanya gwonka ogumushemereire; kandi aha rubaju orundi akuziibwe kuhika omu iguru, kubagana na Ruhanga entebe ye ey'obukama nk'omwanya gwonka ogushemereire omugabekazi nk'ogwo.

Kwonka omu Busingye obu bw'Ekanisa ya Suatira n'OMUKAZI ORIKUTEGYEKA. Ni Babulooni y'Omubonano. Ni maraaya omukuru. Ni Yezebeeli nabikazi w'ebishuba. AHABWENKI? Ahabw'okuba omukazi w'amazima ayorobera Ruhanga. Kristo niwe mutwe gwe. Taine kigambo kureka ekya Kristo, taine biteekateeko kureka Ebye, taine bwebembezi kureka obwa Kristo. Kwonka ekanisa egi eri eta? Enagire aheeru Ekigambo, yaahwerekyereza Zaabaiburi n'ebihandiiko ebishemereire by'abantu abarikutiina Ruhanga. Eitsire abo abaakubaasize kubuurira amazima. Neetegyeka abagabe, n'abanyiginya n'amahanga - neetegyeka amahe kandi ehamiza kimwe ku niyo mubiri gwa Kristo ogw'amazima kandi ngu baapaapa baayo n'abajwekyerwa ba Kristo. Sitaane egibehabeihire kimwe okuhitsya obu nayo ehindikire erikubehabeihira abandi. N'omugore wa sitaane kandi erugirwemu amadiini g'ebizaarwa bya Sitaane.

Etwire neetegyeka omu Busingye bw'Omwirima bwona. Okumara emyaka erikurenga magana mwenda ekanyaga kandi yaahwerekyereza. Ekaita ebyabaire bikozirwe kushemeza amaisho, yaacwekyereza sayansa, tiyarugwamu kintu kyona kureka rufu okuhitsya obu omushana gw'Amazima haihi gwaburiire kimwe hakatsigara akashana kakye munonga. Amajuta na viinyo bikaba biri hakye kurekyer'aho kusheneneka; kwonka n'obu

yaabaire etegyeka obugabe bw'ensi kandi ekagyema ngu abantu boona babe abaayo, hakaba hariho akabiina kakye k'abantu akaabaire kari aka Ruhanga kandi owaabo hakaba hari omu iguru, kandi ahari abo ekaba etarikubaasa kubahwerekyereza. Ruhanga akarinda obusyo Bwe obukye; bakaba batarikubaasa kucwekyerezibwa. Ekanisa ya Rooma egi ekaba etarikutiina Ruhanga kandi eri mbi nk'Omugabekazi Atalia owaagyerizeho kuhwerekyereza oruzaaro rw'omugabe rwona kandi akaba ari haihi kusingura, kwonka RUHANGA AKARINDAHO OMWE, kandi okuruga omuri ogwo haakomookamu abeesigwa baingi. N'ahabw'ekyo Ruhanga akarinda obusyo bukye omuri ekyo kiro kiraingwa eky'omwirima kandi ahabw'amazima gaabo aha muheru hakarugamu Luteeri.

Omuntu weena orikumanya ekintu kyona ekikwatsire aha kanisa Enkatoriki ya Rooma n'omuringo gwayo gw'okuramya naabaasa kumanya ahabw'enki orurembo oru rwa Suatira rwatoorainwe Omwoyo kujwekyera ekanisa y'omu Busingye bw'Omwirima. Nkikyo aho, omu maisho gaitu buzima.

OBUSINGYE

Obusingye bwa Suatira bukamara obwire buraingwa okukira obundi bwona, nk'emyaka 900, okwiha omu mwaka gwa 606 okuhitsya omu gwa 1520.

ENTUMWA

Ekanisa ekaba emazire obwire buraingwa eyecwiremu ebibiina bibiri, ekya Burengyerwa-izooba na Burugwa-izooba. Buri kaire hakaba haimukaho omuhunduuzi omu kicweka kimwe nari omuri byombi kandi ahabw'omwanya mukye ayebempera akacweka k'ekanisa kamwe omu kukwatanisa na Ruhanga okuhamire. Omushaija nk'ogwo omuri Burengyerwa-izooba akaba ari Francis owa Assisi. Buzima akaba omusinguzi kumara obwire, omurimo gwe aha muheru gukagarugwa ahansi n'abakuru b'ediini ya Rooma. Petero Waldo owa Lyons, omushuubuzi owaayatwire akaruga omu magara ge g'obuteeta ahari Ruhanga, akeejumbira kimwe omu kuheereza Mukama atyo yaareeta baingi ahari Ruhanga; kwonka akazibirwa omu murimo gwe atyo yaabingwa paapa. Ebibiina bya Burengyerwa-izooba n'ebya Burugwa-izooba bikaba bitainemu muntu owaabaire naabaasa kuba entumwa aha busingye obu waarebera omu mushana gw'Ebyahandiikirwe. Kwonka, hakaba hariho abashaija babiri omu Birwa bya Bungyereza, abu obuheereza bwabo omu Kigambo n'ebikorwa bwabaire nibubaasa kuhamibwa ngu n'obw'amazima. Bakaba bari Patrick Orikwera na Kolumba Orikwera. Kolumba Orikwera niwe enteenyu yaakwatsire kuba entumwa.

N'obu entumwa y'Obusingye bwa Suatira yaabaire ari Kolumba Orikwera, niinyenda kugamba aha magara ga Patrick Orikwera omwanya mukye nk'eky'okureeberaho ahariitwe kandi n'okworeka ekishuba kya Rooma ngu Patrick Orikwera akaba ari owaayo munonga nk'oku na Joan owa Arc yaabaire ari owaayo. Patrick akazaarwa munyaanya wa Martin Orikwera omuri tauni nkye eya Bonavern aha nkungu y'omugyera gwa Clyde. Eizooba rimwe ku yaabaire naazaanira aha rubaju rw'omugyera ogwo na banyaanya be babiri, abambuzi b'aha maizi bakairira haihi baabanyaga boona bashatu. Ei banyaanya be baagiire, tihariho orikuhamanya, kwonka Patrick (eiziina rye akaba ari Succat) akaguzibwa omutegyeki w'omu Matemba ga Ireland. Omurimo gwe gukaba guri okuriisa empunu. Omu kukora eki akatendeka embwa. Embwa ze zikaba zitendekirwe gye munonga okuhitsya obu abantu baabaire baruga haihi na hare kwija kuzigura. Omu kugira eirungu kwe akagarukira Ruhanga yaajunwa. Bwanyima yaizirwa ekyetengo ky'ahonaaho ky'okutoroka akagaruka omu ka aha bazaire be. Omwoga gwe gw'okutendeka embwa gukamuhwera munonga omu puraani ei yaateire. Akeegyesa embwa kumubyamaho zikashweka omubiri gwe n'obwegyendesereza n'okutamurugaho kuhitsya obu araaziragiire. Reero eizooba rimwe mukama we ku yaagurize embwa nyingi, Patrick akaragiira embwa ezo, okwihaho eyaabaire neezeebempera, kutaaha omu bwato. Bwanyima embwa eyaabaire neezeebempera yaagiha akamanyiso ngu eirukye eyangye kutaaha omu bwato. Mukama we n'omuguzi ku baabaire nibagezaho kukwata egyo mbwa, Patrick yaatamba omu bwato yaakorera ezo mbwa akamanyiso ngu zimushwekye. Reero naakoresa ekicurizo yaayeta egyo mbwa eyaabaire neezeebempera omu bwato kandi nayo yaamuza ahaiguru. Nk'oku Patrick yaabaire ataine ahu arikurebwa omuguzi w'embwa akareega amatanga g'obwato yaaza omu nyanja. Ku yaaherize kuhamya ngu omurimbi ari hare munonga atarikubaasa kugaruka enyima, Patrick akakorera embwa akandi kamanyiso akaazireeteire kweshaaringa. Bwanyima yaarugayo yaagambira omurimbi ngu ku yaakuba atamwambukize akamuhitsya omu ka akaba naaza kuragiira embwa ezo kugumizamu nizeeshaaringa, kandi akaba naaza kunyaga obwato obwo. Kwonka kandi, mukuru w'obwato ogwo akaba ari Omukristaayo, kandi ku yaahuriire eby'ogwo mutsigazi, yaamwambutsya ashemereirwe yaamuta omu ka owaabo. Okwo Patrick akaza omu ishomero rya Baiburi atyo yaagaruka omuri Ireland ei ahabw'Ekgambo n'amaani ga Ruhanga omu bumanyiso bwingi n'eby'okutangaaza yaareetsire enkumi n'enkumi ahari Mukama. Tihariho omurundi na gumwe ogu yaagiire Rooma n'obu kwakuba okuheereza Rooma emutumire. Amazima g'eki gari ngu aha muheru Rooma ku yaatungire obushoboorozi aha kirwa ekyo kandi ku baareebire obwire buhikire, baita Abakristaayo abarikurenga 100,000 abaabaire omu myaka mingi bakomookire omu kibiina ekyabandize ekyabaire kiizire ahari Mukama ahabwa Patrick Orikwera.

Nk'emyaka 60 Patrick Orikwera aherize kufa, Kolumba akazaarirwa omu Ishaza rya Donegal, omu Matemba ga Ireland, omu ka y'obugabe ya Fergus. Akahinduka omwegi w'obwengye bwingi, oyeheireyo ahari Ruhanga, orikwijuka Ebyahandiikirwe ebirikukira obwingi. Ruhanga akamweta omu iraka eririkuhurirwa kuba omumiishani. Ahanyima y'okuhurira eiraka rya Ruhanga, tihariho ekyakubaasize kumuzibira, kandi n'obuheereza

bwe bw'eb'y'amahano bukareetera ab'eb'yafaayo baingi kumukuza haihi kumuhitsya aha rurengo rw'entumwa. Obuheereza bwe bukaba buri bukuru munonga n'obumanyiso oburengire eby'obuhangwa bukaba nibureebwamu okuhitsya obu (kukira munonga abeegi ba Rooma) baatekateekire ngu ebirikumugambwaho bakabikuriiriza.

Omuri rumwe aha ngyendo ze z'obumiishani, ku yaabaire nairira haihi y'orurembo oruzitiirwe n'orugo, akashanga amarembo gakingirwe ngu arekye kutaahamu. Akaimutsya eiraka rye yaashaba ngu Ruhanga abitaahemu amwikirize kuhika aha bantu abone kubuurira. Kwonka ku yaabaire naashaba abarogi b'omu kikaari baatandika kumurwanisa n'orwari rwingi. Atyo yaatandika kweshongora zaaburi. Ku yaabaire naayeshongora, Ruhanga yaayongyera aha iraka rye ryaza ahaiguru ryashweka oruyombo rw'abatatiina Ruhanga. Ahonaaho amarembo gaayeigira. Yaataahamu yaabuurira Engiri, yaareeta baingi ahari Mukama.

Omurundi ogundi Kolumba ku yaabaire nabwo azibiirwe kuza omu kyarwo, ku yaabaire naahinduka kugarukayo, ahonaaho omwana w'omutegeyeke yaarwarira kimwe, yaahika aha ncwamba za rufu. Baaronda Kolumba Orikwera buguru butakora hansi baamugarura. Ku yaashabire okushaba kw'okwikiriza omwojo ogwo yaakira ahonaaho. Reero orwigi rwaigurwa Engiri yaabuurirwa omu kyarwo ekyo.

Engiri eshemeire eyaabuurirwe Kolumba n'abakozi bagyenzi be ekabuga Scotland yona, yaagigarura ahari Ruhanga. Engiri egyo ekambuka yaaza omuri Ireland kandi yaarengyera n'omu Matamba ga Buraaya. Omuringo ogu yaakoreise kujanjaaza Engiri ni gumwe ogu shana nk'abashaija ikumi na babiri baine omwebembezi baabaire baza omu mwanya musya bakombekamu etauni aha musingye gw'Engiri. Omuri aba bashaija ikumi na babiri hakaba habamu ababeizi, abeegyesa, ababuurizi, n'abandi, boona bashongokire oburengye omu Kigambo n'okutuura amagara agarikwera. Ogu mwanya mukye ogu baabaire bakwata bakombeka bakaba bagwetooroza ekisiika. Omu bwire bukwe ekigo eki kikaba kyetooroowa abeegi n'abantu baabo omu maka gaabo, nibeega Ekigambo kandi nibeeteekateekyera kugyenda kuheereza Mukama nk'abamiishani, abeebembezi, n'ababuurizi b'Engiri. Abashaija abo bakaba baine obugabe bw'okushwera n'obu baingi batarakikozire, ahabw'okukunda kuheereza Ruhanga kurungi. Bakaguma beetantaire obuhwezi bwa gavumenti, kandi kyabareetera kuguma bari mwere ahabw'okutakwatanisa n'eb'y'obutegeyeke. Omu mwanya gw'okutaahirira agandi madiini bakeegyesa amazima ahakuba bakaba nibaikiriza ku amazima gari ekikwato ekirikumara kubahitsya ahari ebyo ebi Ruhanga abainiire omu nteekateeka Ye. Bakaba bataine kakwate koonna na Rooma.

Kolumba Orikwera niwe yaatandikire eishomero ry'amaani erya Baiburi aha kirwa kya Hy (seeri y'omwaro gwa Scotland omu Bukiizi-bwa-buryo bwa Burengyerwa-izooba). Obu yaaza ahari ekyo kirwa kikaba kiri entara y'amabaare kitarikubaasa kweraho eby'okurya by'okubatunga boona. Kwonka Kolumba akabyara embibo n'omukono gumwe obwo ogundi agwimukize ahaiguru naashaba. Ebiro ebi ekirwa ekyo ni kimwe aha birwa ebirikukirayo kweza omu nsi yona. Kuruga omuri eki kirwa ekyabaire kiri aha musingye gwa Baiburi hakarugamu abeegi b'amaani baijwire obwengye n'amaani ga Ruhanga.

Ku naashomire ebyafaayo by'omuheereza ogu mukuru wa Ruhanga n'omurimo gw'okutangaaza ogu yaakozire, kikareetera omutima gwangye obusaasi kushanga ngu amaani g'obwa paapa, gaabaire nigaruruutira kukwata abantu boona, gakaija kandi aha muheru gaashiisha emyanya egi y'abamiishani gatyo gaahwerekereza amazima nk'oku gaayegyesiibwe Kolumba.

OKURAMUTSYA

Okushuuruurwa 2:18, “Ebi nibyo bigambo by'Omwana wa Ruhanga, oine amaisho agari nk'endimi z'omuriro, n'ebigere Bye biri nk'omuringa ogurikwengyenyeta.”

Okushuuruurirwa Obwaruhanga aha Busingye bwa Suatira kuri ngu Yesu n'Omwana wa Ruhanga. Omu biro ebi Yaabaire ari omu mubiri Akaba naamanywa nk'Omwana w'Omuntu. Kwonka kuruga obwo Titukimumanyira omu mubiri. Takiri Mwana w'Omuntu, Nabi Omukuru, Omuriwe hateeraniirwemu obunabi bwona. Owaazairwe ari Omwe Nyamunegyere agarukire omu kifuba kya Ishe. Hati Nitumumanya ahabw'amaani g'okuzooka. Azookire Yaayegarurira amaani Ge maingi kandi Naakira byona kandi Ari ahaiguru ya byona ahabw'okuhimbisiza ekitiinisa Kye. Ekitiinisa Kye tarikibagana n'ondiijo. Obwebembezi Bwe aha kanisa tariburekurira muntu weena.

Kristo naanaga amaisho Ge ahari Suatira, atyo Areeba omu rurembo orwo n'omu busingye obwo obwa kana ekitiinisa Kye wenka, kihairwe ondiijo. Amaisho Ge nigamurinkana n'omuriro gw'ekiniga n'orubanja yaaba Naareeba emandwa Apollo erikuheebwa ekitiinisa nk'Omwana wa Ruhanga, haza obwo Ariwe Wenka Nyamunegyere Owaazairwe Ishe. Orubanja Rwe ka niruteekwa kuba nirutiinisa aha diini y'Obusingye bwa Suatira omu baamemba b'ekanisa bari nk'abapagaani abarikurama omwana wa ruhanga (emandwa Apollo mutabani wa Zeus), kutunguura omuntu omutegeyeke kuramibwa, nibashagikwa amaani ga gavumenti. Ahakuba buzima ekyo nikyo Kristo yaareebire. Ekanisa Enkaturika ya Rooma, ekeemarira kimwe omu kurama ebishushani eyegamiire emigyenzo ya ruhanga w'eizooba (emandwa Apollo) yaakuza omuntu kuhika aha rugyero rwa ruhanga (paapa) kurabira omu kwegaita kw'ekanisa na gavumenti. Ahakuba Thomas Aquinas na Alverus Pelagius bakataho engyenderwaho baagira bati: “Ahari abo abarikumureeba n'eriisho ry'omwoyo, paapa naareebeka kuba atari muntu, kureka Ruhanga. Tihariho bugarukiro aha bushoboorozi bwe. Naabaasa kurangirira eki arikwenda kuba ekihikire kandi yaakisiima naabaasa kwaka omuntu weena obugabe bwe.

Okubanganisa aha bushoboorozi bwe obu oburikubuga ensi yona nikipureetera kukingirwa aheeru

y'okujunwa. Abazigu bakuru b'ekansa n'empabe ezitarikwija kujwara omugamba gw'okworoba okw'amazima.“

“Hariho Ruhanga omwe, kandi n'Omuteerani omwe owa Ruhanga n'abantu, ogwo muntu ni Kristo Yesu (Omwana wa Ruhanga).” 1 Timoseo 2:5. Kwonka paapa wa Rooma ahindwire Ekigambo ekyo. Yaakihindura ati, “omuteerani omwe ahagati ya Ruhanga n'omuntu (batari bantu).” Mbweni hati niwe muteerani ori ahagati y'omuteerani n'abantu. Kwonka tihariho ondiiho muteerani kureka Omwana. Paapa arangiirira okujunwa kurabira omu kansa ya Rooma. Kwonka tihariho okujunwa otarabire omu Mwana wa Ruhanga. Ti ky'okutangaza amaisho nigaakira omu kubuguma kw'orubanja. Ti ky'okutangaza ebigyere biri nk'omuringa gushemeziibwe obwo Ayeteekateekire kuribatiirira obugabe bubi bw'ensi egi akabucwa esaano n'omucuucu. Siima Ruhanga ahabw'ebyo bigyere by'amaani eby'omuringa. Birabire omu rubanja ahabwaitu. Nibyo

omusingye gwaitu hati ahakuba eki Yaatungire n'ekyaitu. Tworekirwe Omuriwe, Yesu Omwana wa Ruhanga.

Omu busingye obu nimwo turikureeba okwimukaho kw'Abasilaamu abaayehakaine Omwana wa Ruhanga batyo bakamariirira kwita boona abaabaire nibeeyeta Abakristaayo.

Nabwo n'omu busingye obu obu ekanisa y'ebishuba yaayanga butunu ekiragiyo ky'okubanza kya Ruhanga Ow'obushoboorozi bwona kandi ahonaaho ekatandika kuhenda ekiragiyo kya kabiri ahakuba ekata paapa waayo omu mwanya gwa Yesu Kristo yaahamya kandi yaagyema abantu kuramya ebishushani okuhitsya obu abo abaayangire kuta ebishushani ebiramibwa omu kansa baabaire nibateekwa kwitwa. Omu butegyeki bw'omugabekazi Theodora, wenka, okuruga omu mwaka gwa 842 okuhitsya omu gwa 867, abarikwera abarikurenga 100,000 bakaitwa ahabw'okuba ebishushani ebirikuramibwa bakabitwaramu nk'ebitane mugasho.

Buzima kwo obusingye obu nibuteekwa kweteisa nari bufeerwe byona. Ngugwo ayemereire aho Mukama w'ekitiinisa, Ruhanga ori buzima Ruhanga - Ekigambo Kye kitairwe aha rubaju, obuntu Bwe bwangirwe, kwonka engaro z'abantu n'emitima y'abantu tibirikubaasa Kumwimuura. Reka Bamwehakane, Naaguma ari omwesigwa. “Mutatiina imwe obusyo bukuye; ahakuba Shoimwe naasiima munonga kubaha obukama. Kandi ku Ndiija n'ebigyere by'omuringa n'amaisho agarikumurinkana, Ndyabaihura; okucwa orubanja n'Okwangye, Ndyabaihura,” nikwo Mukama arikugira.

OKUSIIMA

Okushuuruurwa 2:19, “Nimmanya emirimo yaawe, n'okukunda kwawe n'okwikiriza n'okuheereza n'okugumisiriza kwawe, kandi nimmanya ngu emirimo yaawe eya bwanyima neekira ey'okubanza.”

Hanu omurundi ogundi nitushanga ebigambo ebirikutandika biri bimwe, “Nimmanya emirimo yaawe.” Omwana wa Ruhanga, We wenka, akagira ati, “Muunyikirize ahabw'emirimo yonka.” Akahamisiriza emirimo Ye obu yaabaire ari omu nsi. Emirimo ei Yaakozire ekaba eteekateekirwe Ruhanga okwimutsya okwikiriza Omuriwe. Kikaba kiri ekicweka kikuru ky'obuheereza Bwe. Omwoyo We Orikwera omuri Paulo entumwa akagira ati, “Ahakuba turi ebhangirwe Bye, ebi yaahangiire omuri Kristo Yesu okukora emirimo emirungi, ei Ruhanga yaateekateekire ira, ngu tube niyo twagyenderamu.” Abaefeso 2:10. Emirimo egi ekaba eri ey'okwimutsya okwikiriza Omuriwe ahakuba neeza kworeka obuzaare obwo Ahariwe obu Paulo arikushoboorora “nk'ebhangirwe Omuriwe.”

Hati emirimo terikwija kuza omwanya gw'okwikiriza omuri Ruhanga ahabw'okujunwa kwaitu. Kwonka emirimo neiya kworeka okwikiriza kwaitu okwaherize kuteebwa Omuriwe. Emirimo mirungi terikwija kukujuna, kureka neeruga omu magara agajunirwe nk'ebyana ahari Mukama. Niinyikiriza omu mirimo mirungi. N'obu omuntu yaakuba atajunirwe, ashemereire kukora emirimo mirungi kandi akore kurungi nk'oku arikubaasa. Eky'eihano omu maisho ga Ruhanga n'abantu kukora emirimo mibi haza bakagira ngu nibakora okukunda kwa Mukama. Ekyo niky baabishopu na baapaapa n'abakuru b'ediini ba Rooma baabaire nibakora. Bakaba nibaita, nibaremahaza, kandi nibakora ebibi by'emiringo yoona omu Iziina rya Mukama. Bakatuura amagara agaabaire nigahakanisiza kimwe eki Ekigambo kirikwegyesa. Omu biro bibi ebyo abaikiriza b'amazima bakaaka nk'omushana omu mwirima obwo nibagumizamu kukora ebirungi; ahakuba omukyeeno bakagwihura omugisha, kandi bakakora eby'amazima kuhaisa Ruhanga ekitiinisa n'obu baingi baraabe bakibaitiire.

Omu mushororongo ogu Kristo naasiima abaana Be ahabw'okuba bakaba batwire amagara agahindwirwe. Emirimo yaabo ekaba neejurira Omwoyo musya omuribo. Abantu bakareeba emirimo yaabo emirungi baaha Ruhanga ekitiinisa. Eego sebo, ku oraabe ori Omukristaayo nookora ebihikire. Emirimo yaawe neeyoreka ku omutima gwawe guhikire. Kandi tikirikuba ekintu eki orikwegiza, ahakuba noiya kukora okukunda Kwe n'obu haakuba hatariho n'omwe orikukureeba kureka Ruhanga, kandi noiya kukora okukunda Kwe n'obu kyakukwitisa.

“Nimmanya okukunda kwawe, okuheereza kwawe, okwikiriza n'okugumisiriza kwawe.” Noiya kwetegyereza ku okukunda kwabo kuteibwe ahagati “y'emirimo” “n'okuheereza.” Kandi ogwo nigwo mwanya oguhikire gwayo, ahabw'okuba ahu rukundo etari emirimo yaitu terikwikirizibwa omu maisho ga Ruhanga. N'obu kwakuba okuheereza kwaitu. Paulo naagambira Abakorinso akagira ati, “Naaba ntaine okukunda, nimba ntari kintu, kandi kyona eki ndikukora nikiba kitaine mugasho kureka kyakorerwa omuri rukundo.” Hati noobaasa kureeba aha ngu abaikiriza aba bakaba batari omu kibiina ekyo ky'Abanikolaiti abaabaire bakora emirimo nk'oburyo bw'okujunwa nari kusiimwa abantu. Bakakora emirimo yaabo ahabwa rukundo ya Ruhanga eyaabaire eshukirwe omu mitima

yaabo Omwoyo Orikwera. Rukundo egyo omu mitima yaabo ekaba eri Rukundo ya Ruhanga ahabw'Abe. Yesu akagira ati, "Ahabw'eki abantu boona baryamanya ku muri abeegi BANGYE, ku murikundana." Abapagaani abaareebire amagara g'Abakristaayo ab'okubanza bakagira bati, "Reeba oku barikukundana." Yohaana akagira ati, "Omuntu weena ogira rukundo aba azairwe Ruhanga." 1 Yohaana 4:7.

Niinyenda kuhabura hanu. Nigigamba aha bikwatiraine n'ebiro by'aha muheru ngu ahabw'obugomi kukanya okukunda kwa baingi kuryahora. Omuri Laodikea, nari obusingye bw'aha muheru, okwekunda, n'okukunda obutungu kuryatwara omwanya gwa rukundo ya Ruhanga y'amazima. Tushemereire kwerinda amaani g'ekibi omu biro ebi eby'aha muheru. Baingi munonga nibagangaazibwa ahabw'okuba tibakeetegyereize enkora y'omwoyo ogu ogw'ebiro by'aha muheru. Obu n'obwire bw'okwirira haihi Ruhanga n'okumureka akaijuza amagara gaitu na rukundo Ye, kitari ekyo nitwija kuhurira obufuki bw'ekansa y'ebiro by'aha muheru, kandi twangye amazima ga Ruhanga gonka agarikubaasa kutuhwera.

Omu myaka egyo y'omwirima kandi ey'akabi kaingi omuzaabibu gw'amazima gukagumya rukundo yaagwo ahari Ruhanga n'okukunda ab'eishe-emwe. Ruhanga akabasiima ahabw'ekyo.

"Nimmanya okuheereza kwawe." Yesu akagira ati, "Ogwo orikukira boona obukuru niwe muheereza wa boona." Omushaija omunyabwengye akagamba aha bigambo ebyo. Ebi nibyo bigambo ebi yaagambire, "Ebyafaayo byonka nibyo birikwija kuhamya amazima g'ebigambo ebyo." Omushaija ogwo akaba ahikire. Abantu boona abakuru buzima omu byafaayo bakaba bari abaheereza. Abo abaagyemire abandi kubaheereza; abo abaabonaboneise abandi; abo abaabaire obutoosha benda kwekuza, bakahendera bahemukire. N'obu baakuba abatungire bingi Ruhanga abacwera orubanja baaba batakoreise obutungu bwabo omu buryo buhikire. Kwonka reeba omu byafaayo kandi noiya kushanga ngu abakuru buzima bakaba bari abo abaaheereize abandi. Omu byafaayo abaakoreirwe bingi tibo barikusiimwa kureka haryaguma nihasiimwa abo abaakoreire abandi bingi. Hati ka tukorese ekyo ahariitwe. Nk'oku Omwana w'Omuntu ataraizire kuheerezibwa kureka okuheereza, naitwe nikwo tushemereire kukuratira eky'okureeberaho ekyo. Reeba oku Arikwinama aha bigyere by'entumwa akanaabisa ebigyere e

iruhire byabo kandi ebigubire. Akagira ati, "Hati timurikumanya eki Ndikukora, kwonka nimwija kukimanya ahanyima. Kwonka eki muraarebe Ninkora naimwe mushemereire kukikora." Akahinduka omuheereza kwenda ngu Ruhanga abaase kumwimutsya Amute omu mwanya ogurikukirayo kuba ahaiguru. Kandi ekiro kimwe obu abarikwera baricwerwa orubanja nitwija Kumuhurira naagira ati, "Kazaare, iwe OMWAMBARI omurungi orikwesigwa! Taaha omu kushemererwa kwa Mukama." Kigumire buriijo kuba omuheereza. Kwonka abo abarikuhayo kandi bakeehayo ahabw'abandi eizooba rimwe baryashutama Nawe aha kitebe Kye ky'obukama. Obwo, kiryaba kibishemereire byona. "Ka tukorese Mukama, okwiha nibutaagurikana okuhitsya omu kurengarenga kw'eizooba, ka tugambe ahari rukundo Ye yoona ey'okutangaza n'okureeberera Kwe; kandi eby'amagara aga ku biriba byahweire, n'emirimo yaitu omu nsi yaahweire, kandi amaziina ku garyetwa omu iguru ndyaba ndiyo."

"Nimmanya okwikiriza kwawe." Hati tarikugamba hanu nk'oku Yaagambiire ekanisa y'omuri Perugamo, "Ogumire omu kwikiriza KWANGYE." Tarikugamba aha kwikiriza Kwe hati, kureka naabasiimira obwesigwa bwabo. Kandi omu kukora atyo Naagaruka agamba aha "kugumisiriza" kwabo. Hati obwesigwa n'okugumisiriza bigyenda hamwe. Omu mazima okugumisiriza kuruga omu bwesigwa, ahakuba nikigira omuri Yakobo 1:3 kiti, "Okugyezibwa omu kwikiriza kwanyu kurugamu okugumisiriza." Buzimazima tihariho obundi buryo bw'okutungiramu okugumisiriza. Nikuteekwa kwija nikurabira omu kugyezibwa kw'okwikiriza kwaitu. Abarooma 5:3, "Omu busaasi harugamu okugumisiriza." Oku Ruhanga atwaramu okugyezibwa kw'okugumisiriza kwaitu nk'ekintu kikuru munonga nitukureeba omuri Yakobo 1:4, "Kandi murekye okugumisiriza kuhitsye omurimo gwakwo, naimwe mubone kuba abahikire omuri byona, mutaine ki mubuzirweho." Okukunda kwa Ruhanga ahariitwe n'Okuhikiirira. Kandi okwo kuhikiirira n'okugumisiriza - okutegereza ahari Ruhanga kandi n'okutegereza Ruhanga. Obu nibwo buryo obu engyesho zikororwamu. Ruhanga ka yaasiimire munonga abarikwera aba ab'omu Busingye bw'Omwirima. Bakagumisiriza nk'abaana b'entaama abarikutwarwa omu ibaagi, beekundiire, omu bwesigwa bakaheereza Ruhanga. Nikyo ekyo kyonka eki baabaire nibenda omu magara aga, okuheereza Mukama waabo kwonka. Ekihembo kyabo ka kyabaire nikiza kuba kikuru.

"Nimmanya emirimo yaawe, kandi Nimmanya ngu emirimo yaawe eya bwanyima neekira ey'okubanza." Buzima eki n'eky'omutaano. Oku omwirima gw'obusingye obu gwayeyongyere; oku orunyiriri rw'abaitirwe ahabw'okwikiriza kwabo rwagumire nirweyongyera oburaingwa buriiizooba, bakeeyongyera kukora obucweka ihembe, baaheereza okukiraho, kandi okwikiriza kwabo kwayeyongyera. Ka n'eky'eihano kushanga ngu omu Busingye bwa Efeso rukundo ekakyendeera. Kandi omu mazima tihariho ekigambirwe aha kweyongyera kw'okukora okurikuruga omu kukunda omu busingye obundi; kureka omu busingye obu, obusingye bw'omwirima oburikurirayo obundi bwona, bakeeyongyera Kumuheereza n'okukiraho. Eki ka n'eky'okwegyeraho. Tihariho kwemereza okuheereza oku okw'embabazi z'okukunda Mukama, kureka nikweyongyera. Egyo niyo naama. Reka omuzigu agezeho kutuzibira kuheereza Mukama - okugarukamu kwaitu n'okwegyeraho kuheereza. Abagwire enshazi baaba nibarira nibataka ahabw'obwoba, obwo nibwo bwire bw'okuteera akaari k'obusinguzi.

"Nimaanya emirimo yaawe, kandi Nimmanya ngu emirimo yaawe eya bwanyima neekira ey'okubanza." Hati nk'oku twamara kugamba, obusingye obu nibwetwa Obusingye bw'Omwirima ahabw'okuba buzima nibwo

bwabaire oburikurirayo kimwe kuba obw'omwirima omu byafaayo byona. Bukaba buri obusingye bwa Paapa Innocent III owaayetwairamu ngu akaba ari “omujwekyerwa wa Kristo - orikwemariirira omu kukurira ekanisa n'ensi,” owaataireho INQUISITION (kooti y'ebiragiyo eyaatairweho paapa wa Rooma kucwa emishango kandi n'okufubira abo abaabaire batarikwikirizana n'enyikiriza z'Ekeleziya) kandi ahansi y'obwebembezi bwe eyaasheeshire eshagama nyingi okukira omu bunaku obundi bwona kureka omu bwire bw'Okuhunduza. Bukaba buri obusingye bwa Pornocracy, obutegyeki bwa baamaraaya. Sagarius III akaba aine omukazi w'ekinyanshunju atyo “yaijuza kwaya ya paapa baamaraaya n'ebinyandaaro kandi yaahindura ekikaari kya paapa enyanga y'abambuzi.” Anastasius owa III akanigwa yaitwa Marozia owaabaire ari omukazi w'ekinyanshunju kya Sagarius. Yohaana XI akaba ari ekinyandaaro kya Marozia. Yohaana XII akaba ari mwijukuru wa Marozia kandi “akahamba abafaakazi n'abaishiki abashugaine kandi yaitirwa omu kikorwa ky'obushambani iba w'omukazi owaamugiriire ekiniga kingi.” Bukaba buri obusingye bw'Okwebaganisamu kw'obwa Paapa ahakuba hakabaho baapaapa babiri abeemekirwe (omwe naategyekyera Avignon ondijjo naategyekyera Rooma) zikakyeenana kandi zaarwanisana. Baapaapa aba tibaragizire mushango gw'ebikorwa bibi by'obushambani gwonka (kuzaara ebinyandaaro bingi, kukora ebikorwa by'obutingwa, n'ebindi) kureka bakaba baine n'omushango gw'okuguza obusaserdooti ahari abo abaabaire bashashura sente ezirikurirayo obwingi.

Bukaba buri obusingye obu omushana gwakirizeyo kwaka mpora, beitu nabwo abaikiriza bakye bakeeyongyera kukora n'amaani oku omwirima gwabaire nigweyongyera kuhika haihi n'aha muheru gw'obusingye obu baingi baimukire nibageyeho kureeta empinduka. Okukora kwabo kukaba kurimu obweziriki bwingi kuhitsya obu kwatemireho omuhanda gw'okwija kw'okuhunduza. N'ahabw'ekyo nk'oku Ekigambo kirikugamba aha busingye obwo, “emirimo yaawe ey'aha muheru (omuheru gw'obusingye obu) neekira ey'okubanza.”

Ekigambo, Suatira, kiine amakuru maingi omuri ago harimu “Ekitambo Ekirikugumizamu.” Baingi eki nibakikiriza kuba obunabi oburikukwata aha nkoresa ya Misa ariyo okugumizamu kuhayo ekitambo kya Kristo. Ekyo n'ekiteekateeko kirungi munonga, kandi nabwo nikibaasa kumanyisa ekitambo ekirikugumizamu omu magara n'omu kukora okw'abaikiriza b'amazima ba Mukama.

Buzima kwo abarikwera aba aba Suatira bakaba nibakirayo oburungi, baijwire Omwoyo Orikwera n'okwikiriza, bahangiirwe emirimo mirungi, nibooreka okuhimbisa Kwe, batarikutwara amagara gaabo nk'eky'omuhendo, kureka nibashemererwa kuhayo ebyabo byona nk'ekitambo kirungi ahari Mukama.

OKUHANA

Okushuuruurwa 2:20, “Kwonka Nyine eki ndikufa naiwe; ogumisiririza (oyehanganira) omukazi Yezebeeli, orikweyeta nabikazi, kandi oyegyesa abahuuku Bangye, akabahabya ngu bashambane, kandi ngu barye ebitambirwe ebishushani.”

Hati n'ogu mushororongo niinyenda ngu mushuume ahaifo aha mushororongo gwa 23 mureebe obuhame bw'amazima makuru agu ntwire nimbareetera kushwijuma obwire bwona. “Kandi n'abaana be Ndyabaita rufu; amakanisa goona garyamanya ngu Niinye ocaaka emitima n'emoyo.” Ntwire ningamba obwire bwona ku buzima hariho amakanisa abiri, n'obu Omwoyo arikugagambira gombi omuri buri busingye, orikushusha oti gakaba gari emwe yonka. Hanu kigambirwe butunu ku n'amakanisa, kandi nikigamba butunu ngu gamwe aha makanisa ago nigareebekyera kimwe ku GATARIKUMANYA ku Niwe Ogwo Ocaaka emoyo n'emitima. Yaaza kukibooreka ku nikwo kiri. Hati kandi, ni makanisa ki agariba ago agatarikumanya amazima aga? Omu mazima n'ekibiina ky'omuzaabibu gw'ebishuba ahabw'okuba abaikiriza b'amazima buzima nibamanya ngu orubanja rutandikira omu nju ya Ruhanga, kandi bo ahabw'okuba abarikutiina Ruhanga, becwera orubanja kugira ngu batarucwerwa.

Hati ahabw'enki amakanisa aga Ruhanga arikugeeta amakanisa Ge n'obu garaabe gari ag'omuzaabibu gw'ebishuba? Amazima gaakyo gari ngu n'Abakristaayo. Kwonka ti Bakristaayo b'Omwoyo. N'Abakristaayo b'omubiri. Beetererwa Eiziina eryo busha. Mako 7:7 “Bandamiza busha, ahakuba enyegyesa y'ebi beegyesa okuba obuhamizo bw'ediini n'ebiragiyo by'abantu.” Kwonka buzima n'Abakristaayo ahakuba n'enki ekindi eki baakubaire? Omusiraamu n'Omusiraamu. Egyo niyo diini ye n'obu yaakuba atwire amagara agarikushushana gata ahabw'okuba naikirizana n'ebigambo ebi Koraani erikwegyesa. Omu muringo nigwo gumwe Omukristaayo n'Omukristaayo kasita aba naikiriza buzima ngu Yesu n'Omwana wa Ruhanga, akazaarwa omwishiki oshugaine, akabambwa kandi akafa kandi yaakazooka, ngu n'Omujuni w'abantu, n'ebindi. (Buzima, omu Busingye bwa Laodikea haryabaho abo abarikweyeta Abakristaayo ahabw'okuba nibaikirizana n'ebintu birungi ebya Yesu, kunu barikwegumiza obushoboorozi bw'okwehakana Obwaruhanga Bwe. Ab'ediini ya Christian Science ekyo baaherize kukikora oyongyeireho baingi ababuurira Engiri Etarikushaasha abantu). N'Omukristaayo otahamize kandi n'omushomi omu Kanisa. Kwonka tari mwikiriza w'AMAZIMA nari w'Omwoyo. Omwikiriza w'omuringo ogwo n'ogwo obatiziibwe omu mubiri gwa Kristo kandi ni memba We. Kwonka n'obu kiraabe kiri kityo, kiri omu ntwaza ya Ruhanga kugira ngu enkyenzi zikurire hamwe n'engano kandi tiziri z'okukuurwa. Ekyo n'ekiragiyo kya Ruhanga. Ekiro kyabo eky'okubohwa n'okwokibwa nikijja; kwonka tikikabaire.

N'ahabw'ekyo Omwoyo naagambira eki kibiina ky'orujwangye. Orubaju rumwe Naahimbisa, kandi orundi Naahana. Yaaherize kugamba ekihikire aha mwikiriza w'amazima. Hati Naarabura eki omuzaabibu gw'ebishuba gurikuteekwa kukora ku guraabe guri ogw'okwemerera gwihirweho orubanja omu maisho ga Mukama.

OGWO MUKAZI YEZEBEELI

Entumwa Yakobo akatworeka omuhanda ogu ekibi kirabamu. Yakobo 1:14-15, “Kwonka omuntu weena ayohibwa, yaabeihwabeihwa okwetenga kwe, kwamwosyosya. Bwanyima okwetenga okwo, ku kuheza kutwara enda, kuzaara ekibi; n'ekibi ku kikura, kizaara okufa.” Hati ekyo n'ekishushani buzima ky'ekirikubaho omu busingye bw'ekana. Nk'oku ekibi kitaine ahu kyatandikiire kureka omu kwehuriramu, nikwo na rufu aha kanisa yaatandikiire n'ebyanguhi, ebikorwa ebirikwetegyezibwa kukye by'Abanikolaiti. Okuruga omu bikorwa ekaba enyegyesa. Okuruga omu nyegyesa yaabumbatira amaani ga gavumenti reero haatandikaho obupagaani. Hati omuri obu busingye neeza ahari nabikazi waayo (omwegyesa) kandi egumizemu etyo okuhitsya obu erikwija kweshanga omu nyanja y'omuriro, ahakuba buzima okwo niyo erikuza kuherera, omu kufa kwa kabiri.

Hati okugamba kwona n'eiraka rihango kwa Ruhanga arikworeka obuhabe aha busingye obu obwa kana nikushangwa omu kuhakanisa Kwe nabikazi ogu, Yezebeeli. Kandi okwetegyezera buzima ahabw'enki Arikumuhakanisa atyo, nitwija kureeba omu byafaayo bya Yezebeeli omu Baiburi kandi ku turazoore ebi yaakozire nyima okwo, nitwija kumanya ekirikugyenda omu maisho omu bwire obu.

Eky'okubanza kandi ekintu kikuru munonga eki turikwega ahari Yezebeeli kiri ngu TARI muhara wa Abrahamu, n'okutaaha kwe omu nganda za Israeli tikurabaire kw'omwoyo nk'okwa Ruusi, Omumoabukazi. Ngaaha sebo. Omukazi ogu akaba ari muhara wa Isi-baali, omugabe w'Abasidoni (1 Bagabe 16:31), owaabaire ari omunyamurwa w'emandwa Asitaati. Isi-baali akaba atungire obutegeye ahabw'okwita owaabaire amubandiize, Filiizi. N'ahabw'ekyo nitureeba ahonaaho ku yaabaire ari muhara w'omwitsi. (Eki buzima nikitwijutsya Kaini). Kandi n'omuringo ogu yaahindukiire ekicweka kya Israeli gukaba gutari kurabira omu mihanda y'omwoyo ei Ruhanga yaabaire ataireho ahabw'Abanyamahanga kwikirizibwa kutaahamu; kureka akataahamu ahabw'OKUSHWERWA Ahabu, omugabe w'enganda ikumi za Israeli. Hati okwegaita oku nk'oku twaheza kureeba kukaba kutari kw'Omwoyo; kukaba kuri okw'eby'obutegeye. Kandi omukazi ogu owaabaire ayemariire omu kurama ebishushani akaba ataine kyetengo kyona ky'okurama Ruhanga Omwe w'Amazima, kureka akaija n'ebigyendererwa ebi yaabaire yaayerahiire biri eby'okuhindura Israeli kuruga ahari Mukama. Hati Israeli (ezo nganda ikumi) ekaba yaaherize kumanya eki kyabaire kiri okurama nyana z'ezaabu, kwonka nabwo bakaba batakeheereireyo kimwe kurama ebishushani, ahakuba Ruhanga akaba naaramibwa kandi n'ekiragiyo kya Musa kikaba nikiikirizibwa. Kwonka okuruga omu bwire obu Ahabu yaashwereiremu Yezebeeli, okurama ebishushani kukeeyongyera omu muringo ogurikutiinisa munonga. Obwire obu omukazi ogu yaahinduka omunyamurwa-kazi omuri hekalu ezi yaayombekyeire emandwa Asitaati (Venus) na Baali (ruhanga w'eizooba) nibwo Israeli yaahika omu bwire bugumire omu kubaho kwayo.

i j Nitukiteekateeka ahari eki nitubaasa hati kutandika kureeba eki Omwoyo wa Ruhanga arikworeka omu Busingye obu obwa Suatira. Nkiki hanu.

Ahabu akashwera Yezebeeli kandi yaakikora nk'akakoryo k'eby'obutegeye okuha amaani obugabe bwe kandi n'okuburinda. Ekyo nikyo buzima ekanisa yaakozire obu yaashwerwa omu butegeye bwa Konsitantiini. Bombi bakegaita hamwe ahabw'enshonga z'eby'obutegeye, n'obu baakiteireho endeebeka y'okuba eky'omwoyo. Hati tihariho n'omwe orikubaasa kuunyikiririsa ngu Konsitantiini akaba ari Omukristaayo. Akaba ari omupagaani aine ekyabaire nikishusha ekirikuranga Omukristaayo. Aha ngabo z'abaserukare akateeraho ebishushani by'emisharaba erikwera. Niwe yaatandikiireho ekibiina ky'Abarinzi ba Kolumba. Akata omusharaba aha munaara gw'ekana y'Orikwera Sofiya omu buryo obwo yaatandikaho omugyenzo.

Ekaba eri enteekateeka ya Konsitantiini kureeta buri omwe kuba bamwe, abapagaani, Abakristaayo abatahamize n'Abakristaayo b'amazima. Kandi ahabw'omwanya mukye kikareebeka orikushusha oti akaba naija kusingura ahakuba abaikiriza b'amazima bakaija kureeba yaaba baabaire nibabaasa kugarura abo abaabaire barugire aha Kigambo. Ku baareebire ngu bakaba batarikubaasa kubagarura omu mazima, bakagyemeserezibwa kwecwaho nibaruga ahari abo ab'ekibiina ekikwataniise n'eby'obutegeye. Kandi ku baakikozire, baayetwa empabe reero baahiiganisibwa.

Ka ngambe hanu ku twine ekintu nikyo kimwe ekirikugyenda omu maisho na hati. Abantu boona nibeegaita hamwe. Nibahandiika Baiburi erikwija kubaasikira buri omwe k'abe Omuyudaaya, Omukatoriki nari Omupurotestante. Baine Orukiiko rwabo rwa Niika kwonka nibarweta Orukiiko Orurikugaita Amakanisa. Beitu noomanya abu ebibiina by'amadiini byona birikurwanisa? Nibirwanisa Abapentekoote b'amazima. Tindikumanyisa ekibiina ky'ediini ekirikwetwa Abapentekoote. Nimmanyisa abo abari Abapentekoote ahabw'okuba baijwire Omwoyo Orikwera kandi baine Obumanyiso n'ebiconco ahagati yaabo ahabw'okuba nibagyendera omu mazima.

Ahabu ku yaashweire Yezebeeli ahabw'enshonga z'eby'obutegeye akaguza obuhunguzi bwe bw'omujigaijo. Waayegaita n'ekibiina ky'ediini nooba waaguza obuhunguzi bwawe bw'omujigaijo, ow'eishe-emwe, yaaba orikwenda kukiikiriza nari otarikwenda. Buri kibiina ky'ediini ky'Abapurotestante ekirarugireyo bwanyima kikagarukayo bakaguza obuhunguzi bw'omujigaijo bwabo, kandi ku oraaguze obuhunguzi bwawe bw'omujigaijo, nooba ori nka Esau - noobaasa kurira kandi oyeteise byona ebi orikwenda, kwonka tihaine eki kirikwija kukugasira. Hariho ekintu kimwe kyonka eki orikubaasa kukora kandi ekyo ni, “Mukirugyemu imwe bantu Bangye 'mwe, kandi murekye kukwatanisa nakyo omu bibi byakyo.” Hati ku oraabe nooteekateeka ngu timpikire,

garukamu ekibuuzo eki kimwe kyonka. Hariho omuntu weena ohuriire orikubaasa kungambira ekanisa nari shi enkora ya Ruhanga eragizireho okusisiimuka reero ekagaruka ahanyima y'okwekoramu ekibiina ekaba ekigombe ky'ediini? Shoma ebyafaayo byawe. Tokaagibona - n'obu yaakuba emwe.

Ekaba eri eshaaha ya nyekiro omu itumbi ahari Israeli obu yaayegaita hamwe n'ensi etyo ekatsigaho eby'Omwoyo ahabw'eb'obutegeye. Ekaba eri eshaaha y'eitumbi ahari Niika obu ekanisa yaakozire ekintu nikyo kimwe. N'eshaaha y'eitumbi hati obu amakanisa garikwegaita hamwe.

Hati Ahabu ku yaashweire Yezebeeli akamwikiriza kutwara esente z'eihanga atyo yaayombeka amaju abiri mahango munonga g'okuramazamu emandwa Asitaati na Baali. Egyo eyaabaire eyombekyeirwe Baali ekaba eri mpango ekirikugasha ahabw'Abaisraeli boona kwija bakaramizamu. Konsitantiini n'ekandisa ku baashweraine akaha ekanisa ebyombeko, kandi yaataho amatambiro n'ebishushani, atyo yaatebeekanisa abakuru b'ediini omu madaara g'ebitiinisa agaabaire gaatandikire kureebeka.

Yezebeeli ku yaatungire obushagiki n'obushoboorozi bwa gavumenti yaagyema ediini ye aha bantu kandi yaita baanabi n'abanyamurwa ba Ruhanga. Kikaba kubi munonga okuhitsya obu Eliya, entumwa y'omu bwire bwe, yaateekateekire ngu akaba ariwe wenka owaabaire atsigaireho; kwonka Ruhanga akaba aineyo 7000 abandi abaabaire batakatsimbiraga Baali amaju. Kandi na hati aheeru okwo omuri ebyo bigombe by'amadiini by'Ababaputisiti, Abametsodisti, Abapuresibateeri, n'ebindi, hariyo bamwe abaraije kurugamu bagarukire Ruhanga. Niinyenda ngu mukimanye ku ntarikuhakanisa, hati, kandi tinkahakanisaga abantu na kakye. N'ekigombe ky'ediini - entwaza y'ekibiina ky'ediini niyo ndikuhakanisa. Nintekwa kukihakanisa ahakuba Ruhanga naakyanga.

Hati ka twemerere hanu edakiika reero tugarukye tweijutsye ebi twihiremu ebirikukwata aha by'okuramya omuri Suatira. Naagizire nti bakaba nibaramya Apollo (owaabaire ari ruhanga w'eizooba) hamwe n'omugabe. Hati Apollo ogu akaba naayetwa "orikwihaho emikyeeno." Akaba aha emikyeeno aha bantu. Abaha omugisha atyo yaaba ruhanga buzima aharibo. Akaba ashemereire kwegyesa abantu. Akaba abashoboororera eby'okuramya, n'emigyenzo ya hekalu, okuheereza baaruhanga, aha bitambo n'okufa n'amagara ahanyima y'okufa. Omuringo ogu yaabaire akoramu eki gukaba guri okurabira omuri nabikazi owaabaire ashutama atembirwe omwoyo gw'emandwa aha ntebe y'amaguru ashatu. Mugyenzi! Waakireeba? Ngugu hanu ogwo nabikazi orikwetwa Yezebeeli kandi orikwegyesa abantu. Kandi okwegyesa kwe nikuhabisa abaheereza ba Ruhanga kubareetera kushambana. Hati okushambana nikimanyisa "okuramya ebishushani." Ago nigo makuru gaakyo ag'omwoyo. N'okwegaita okutari kw'ebiragi. Okwegaita kwa Ahabu n'okwegaita kwa Konsitantiini kwombi kukaba kutari kw'ebiragi. Bombi bakashambana omu buryo bw'omwoyo. Buri mushambani omuheru gwe guryaba omu nyanja y'omuri. Ruhanga nikwo yaagambire.

Hati kandi, okwegyesa kw'ekandisa Enkatorika (ekandisa n'ekikazi, n'omukazi) nikuhakanisa Ekigambo kya Ruhanga. Paapa ariwe Apollo buzima ow'omurembe ogu ayegyeise abantu kwegaita aha bishushani ebirikurambwa. Ekanisa ya Rooma hati ehindukire nabikazi w'ebishuba aha bantu ahabw'okuba ehire Ekigambo kya Mukama aha bantu yaaheereza ebitekateeko byayo kuba ebirikusaasira ebibi, ebirikureeta emigisha ya Ruhanga, kandi n'abasaserdooti bahikire n'aha kugamba bahamize ngu baine obushoboorozi atari omu magara honka kureka n'omu kufa. Nibeegyesa ahabwabo ngu hariyo purigaatori, kwonka ekyo torikubaasa kukishanga omu Kigambo. Nibeegyesa ngu eshaara na zaamisa n'esente nibiija kukwiha omu purigaatori bikutware omu iguru. Entwaza yoonna eyegamiire aha kwegyesa kwayo n'ey'ebishuba. Teri aha musingye oguhamire ogw'okushuuruurirwa kwa Ruhanga omu Kigambo Kye kureka eri aha musheenye ogutahamiire hamwe, ogurikutobera, mubi munonga gw'ebishuba byayo.

Ekanisa ekarugira kimwe omu kibiina yaaza omu kigombe ky'ediini kandi kuruga aho yaaza omu nyegyesa y'ebishuba. Ekyo kihikire. Abakatoriki Abaarooma tibarikwiriza ngu Ruhanga ari omu Kigambo Kye. Ngaaha sebo. Ku baakukikozire bakaashemereire kweteisa kandi bakishagika, kwonka nibagira ngu Ruhanga ari omu Kanisa Ye. Ekyo kikaahindwire Baiburi kuba ebyafaayo by'ekandisa Enkatorika. Ekyo tikwo kiri. Reebe eki baakoreire okubatiza omu maizi kyonka. Bakakwiha omu kubatiza kw'Ekikristaayo baakuhindura okw'ekipagaani omu byeterero. Ka mbagambire oku byangyendeire n'omusaserdooti Omukatoriki. Omwishiki ou naabaire mbatiize obwire bumwe akahinduka yaaba Omukatoriki, atyo Omusaserdooti yaayenda ngu ambuuzi ebirikukwata ahari ogwo mwishiki. Yaabuuza omuringo ogu omwishiki ogwo yaabatiziibwemu. Naamugira nti nkamubatiza omu kubatiza kw'Ekikristaayo arigwo muringo gwonka ogu naabaire nimanya. Nkaba mwibikire omu maizi omu Iziina rya Mukama Yesu Kristo. Omusaserdooti ogwo yangira ngu obwire bumwe Ekanisa Enkatorika ekaba etwaza etyo. Ahonaaho naamubuuza obwire obu Ekanisa Enkatorika yaabaire neetwaza etyo, ahakuba nshomire ebyafaayo byabo kwonka tindabaasize kubona eki yaagambire. Yangira ngu kikaba nikishangwa omuri Baiburi, kandi ngu Yesu niwe yaataire omu buteeka Ekanisa Enkatorika. Naamubuuza ku araabe yaabaire naateekateeka buzima ngu Petero akaba ari paapa ow'okubanza. Yaagamba ahamize ngu Petero akaba ariwe. Naamubuuza yaaba misa zaabaire nizigambwa omu Rulatini kwenda kuhamya ngu zihikire kandi ngu tizaahinduka na kakye. Yangira ngu ekyo n'amazima. Naamugira nti nkaba nintekateeka ngu bakaba baahabire ira munonga kuruga aha ki baabaire baine omu kutandika. Naamumanyisa nti Ekanisa Enkatorika ku eraabe nekiriza Ekitabo ky'Ebyakozirwe, obwo nkaaba ndi Omukatoriki w'omutindo gwa ira. Yangira ngu Baiburi ekaba eri ebyafaayo by'Ekanisa Enkatorika kandi ngu Ruhanga akaba ari omu kanisa. Tindaikirizaine nawe ahakuba Ruhanga ari omu Kigambo Kye. Ka Ruhanga abe ow'amazima kwonka omuntu weena abe omunyabishuba. Ku

oraacweho nari okongyera ahari ekyo Kitabo, Ruhanga akaraganisa ngu naija kwongyera ebibonaboneso ahari abo abarikwongyeraho kandi n'okwakwa omugabo gwabo kuruga omu Kitabo ky'Amagara ku barayeehangye okukicwaho. Okushuuruurwa 22:18-19.

Reka nyorekye gye oku Ekanisa Enkatorika ya Rooma erikwikiriza ngu Ruhanga ari omu kanisa mu mwanya gw'okuba omu Kigambo. Hanu hariho ekyaihirwe omu katabo ka Paapa Yohaana owa 23. "Okumanya oku ntungire omuri egi myaka eshatu nka Paapa, okwiha obu 'omu kutiina n'okutetema' naikiriza obuheereza obu omu kworoba okutarimu katokoozi ahari okwo kukunda kwa Mukama, oku naahairwe okurabira omu Rukiiko Orurikwera rwa Baakalidinaali okwo omu kwehereera, nimpa obujurizi aha mazima aga kandi niyo nshonga endeeteire kukwatwaho maririire kuba omwesigwa aharikwo; okwesigira kimwe Ruhanga, omuri byona ebirikukwata aha bwire obu, kandi n'obucureera obwijwire aha bikwaturaine n'ebiro by'omu maisho." Paapa ogu naagamba ngu Ruhanga akagamba kurabira omu kanisa naashuuruura okukunda Kwe. Ka n'ekishuba. Ruhanga ari omu Kigambo Kye kandi naagamba kurabira omu Kigambo naashuuruura okukunda Kwe. Paapa nabwo akagamba ngu akata obwesigwa bwona omu kigambo ky'abantu kandi omu buryo obwo yaakyorobera n'obucureera. Nikihurirwa kiri kirungi munonga beitu n'ekishuba ky'amaani. Kiri nk'okukiikamya okwabaire omu Kibanja kya Edeni.

Hati ka tuze hanu omu Kushuuruurwa 17 kandi tureebe ogu mukazi, ekanisa, oriho ahabw'obunabi bw'ebishuba beitu kitari Kigambo kya Ruhanga. Omu mushororongo gw'okubanza, Ruhanga naamweta maraaya omukuru. Ahabw'enki ari maraaya? Ahabw'okuba naaramya ebishushani. Akwatiire abantu omu kintu ekyo kimwe. N'enki ekirikutamba okuramya ebishushani? Ekigambo kya Ruhanga. N'ahabw'ekyo omukazi ogu ni maraaya ahabw'okuba atsigireho Ekigambo. Ngugwo ashutami aha maizi maingi, ekirikumanyisa omutwe muhango gw'abantu. Tihariho kubanganisa neeteekwa kuba ekanisa y'ebishuba ahabw'okuba ekanisa ya Ruhanga ni nkye - ni bakye abagizoora.

Yetegereze oku arikushusha omu maisho ga Ruhanga, ti nshonga na yaaba ari murungi ata omu mireebekyere ye omu maisho g'abantu kandi n'obu arikuhurirwa ari omunyabwengye. Asinzire obubi bw'obushambani bwe. Hati akaba asinzire eshagama y'abaafeereire okwikiriza. Nka Yezebeeli owaitsire baanabi n'abanyamurwa kandi akacwekyereza n'abantu ba Ruhanga abaayangire kwinama bakaramya Baali. Kandi buzima ekyo nikyo Ekanisa Enkatorika yaakozire. Bakaita abo abaayangire kworobera obutegeyeki bwa paapa. Abo abaabaire nibenda Ekigambo kya Ruhanga omu mwanya gw'ebigambo by'abantu bakaitwa, kukira munonga nibakoresa emiringo erikushaasha munonga. Kwonka egi kanisa eyaakoreise kwita nayo yonka ekaba efiire kwonka etarikukimanya. Hakaba hatarimu amagara omuriyo kandi tihariho bumanyiso oburagikuratiire.

OMWANYA GW'OKWETEISA

Okushuuruurwa 2:21 "Nkamuha omwanya gw'okweteisa; kwonka yaayanga kweteisa obushambani bwe." Noomanya ku ekanisa egi buzima yaabaire eri mbi okukira Ahabu? Noomanya ku Ahabu yaayeteisize kumara omwanya mukye kandi akagyenda ayecureerize omu maisho ga Ruhanga? Ekyo tokaabaasa kukigamba aha Kanisa Enkatorika ya Rooma. Ngaaha sebo. Tekeeteisaga na kakye kureka ecwekyereize n'amaryo weena kandi na boona abaagerizeho kugihwera kweteisa. Ekyo n'ekyabaireho. Hati Ruhanga akaguma atarikwimutsya ntumwa zonka ahari buri busingye kureka Akaimutsyaho n'abahwezi barungi munonga ahabw'ezo ntumwa. Akaheereza buri busingye abashaija barungi munonga ba Ruhanga kandi baakora buri kintu eki baabaasize kugaruza egyo kanisa ahari Ruhanga. Ruhanga buzima akagiha omwanya n'obuhwezi ngu eyeteise. Ekeeteisa haza yaayoreka ku eyeteisize ahabw'ebiyana byayo? Ngaaha sebo. Tekakikoraga kandi terikikora. Esinzire. Ebihurikizo byayo by'okugibaasiisa kuhurira ebintu by'omwoyo bigihweiremu.

Hati mutaburabuzibwa mukatandika kuteekateeka ngu Ekanisa ya Rooma ekeeteisa okwita kwayo kw'abarikwera ahabw'okuba neegyezaho kwegaita n'Abapurotesitante omu buryo bw'okukora enyikiriza zaayo zikashoronga n'enyikiriza z'Abapurotesitante. Tihariho omurundi na gumwe ogu erashabire okusaasirwa ekagira ngu ekaba egwire ahabw'obwitsi bwayo bwingi munonga. Kandi terikwija kweteisa. Kandi ti nshonga eyorobi kandi neereebeka eboneire eta obwire obu, eryaimukayo egarukye eite, ahakuba obwitsi buri omu mutima gwayo mubi ogutarikweteisa.

OKUSHARWA KW'ORUBANJA RWA MARAAYA

Okushuuruurwa 2:22-23, "Reeba, Niinyija kumunaga aha kitabo n'abashambane be omu kubonabona kwingi, ku baraabe bateeteisize by'emicwe ye; kandi n'abaana be Ndyabaitsa rufu; amakanisa goona garyamanya ngu Niinye ocaaka emitima n'emyoyo; kandi Ndyazimuurira omuntu weena omuriimwe ebishemeire ebi yaakozire."

Enki? Omukazi ogu aine abaana? Kandi ari maraaya? Ku kiraabe kiri kityo ngu akatunga abaana omu bwamaraaya bwe ekirikumanyisa naateekwa kwokibwa n'omuriro nk'oku Ekigambo kyagamba. Ekyo kihikire buzima. Ogwo nigwo muheru gwe ahakuba aryayokibwa n'omuriro. Omuhuru gwe n'enyanya y'omuriro. Kwonka yemereraho reero oteekateekye aha baana aba akaanya kakye. Omukazi niwe orugwamu abaana. Nikireebeka butunu ku omukazi ogu yaabaire aine abaana abaamurugiremu kwonka bakakora ekintu nikyo kimwe eki yaakozire. Nyoreka ekanisa emwe erarugire omu kibiina etaragarukire enyima ekakigarukamu. Tihariho n'emwe. N'obu yaakuba emwe. Aba Luteeri bakarugayo batyo baayekoramu ekibiina ky'ediini baagarukayo kandi ebiro ebi banywaniire kimwe n'egi hururu y'okwegaita kw'amakanisa. Abametsodisiti bakarugayo baayekoramu ekibiina

ky'ediini baagarukayo. Abapentekoote bakarugayo baayekoramu ekibiina ky'ediini baagarukayo. Nihaza kubaho okundi kurugamu, kandi Ruhanga ahimbisibwe tibarikwija kwekoramu ekibiina ky'ediini kugarukayo ahabw'okuba nibamanya amazima. Abo bantu nibaija kuba omugore w'ebiro by'aha muheru.

Hati kigambire hanu ngu maraaya ogu akaba aine abaana. Hati bakaba bari baana ki? Bakaba bari abahara, ahakuba bakaba bari amakanisa nkawe. Hati hanu hariho enshonga erikushemeza munonga. Yezebeeli na Ahabu bakaba baine omuhara. Ogwo muhara yaashwerwa Yehoramumu mutabani wa Yehoshafaati kandi omu 2 Abagabe 8:16 nihagira hati, "Yehoramumu akagyendera omu mitwarize ya ishezaara." Akagyendera kimwe omu kuramya ebishushani ahabw'obushwere obu. Yuda eyaabaire neetiina Ruhanga kandi neeramya Ruhanga akagitaasya omu kuramya ebishushani. Nikyo ekyo kyonyini eki abahara aba boona nigo makanisa gakozire, nk'oku naakworeka. Nigatandikira omu mazima bwanyima gashwerwa omu kibiina ky'ediini gatyo gatsigaho Ekigambo ahabw'emigyenzo, enyikiriza, n'ebindi. Hati ka nyiheyo eki. Omu Baheburaayo 13:7 nihagira hati, "Mwijukye abeebembezi baanyu, abaabagambiire ekigambo kya Ruhanga." N'Ekigambo ekirikututegyeka, ti bantu. Hati omushaija nka iba niwe mutwe gw'omukazi. Naamutegyeka. Kwonka ekanisa nayo n'omukazi, kandi omutegyeki waayo n'Ekigambo. Yesu ni Kigambo. Ku eraayangye Ekigambo ekatwara obundi bwebembezi neeba eri enshambani. Hati ngambira eiziina ry'ekanisa emwe etarugire aha Kigambo ahabw'emigyenzo n'enyikiriza. Goona ni gaamaraaya - nk'oku nyina ari, nikwo n'abahara be bari.

Ekifubiro kya maraaya n'abaana be kiryaba kiiha? Buzima, nikiza kuba eky'enyabubiri. Eky'okubanza Ruhanga akagira ati, "Niinyija kumunaga aha kitabo." Okurugiirira aha kacweka akarikuhereeruka k'omushororongwa

kiryaba ekitabo ky'okubonabonesibwa, nari okubonabona kwingi. Ekyo buzima nikyo Yesu yaagambire omuri Matayo 25:1-13. Hakaba hariho abaishiki ikumi abashugaine. Bataano bakaba bari ab'obwengye abandi bataano bari abashema. Bataano ab'obwengye bakaba baine amajuta (Omwoyo Orikwera) kwonka abandi bataano batagaine. Orwari ku rwateirwe ngu, "Reeba Kishwera yaija!" Bataano abo abashema bakairuka nibasherura amajuta kunu abaishiki abashugaine bataano ab'obwengye bo baagiire omu bugyenyi bw'okushwera. Bataano abaagumire aheeru bakatsigarira okubonabona kwingi. Ekyo nikyo kiryaba ahari boona abatarigiyenda omu kutwara. Ekyo nikyo kirihika ahari maraaya na bahara be. Ekyo kabiri, nikigamba ngu Aryabaita rufu nari okukihindura oku kiri, "Ka baitwe orufu." Oku n'okugamba okutari kwa buriijo. Nitubaasa kugamba tuti, "k'omuntu aitwe orufu rw'okuhanikwa, nari amashanyarazi nari omu gundi muringo." Kwonka eki nikigamba ngu, "Ka baitwe rufu." Rufu yo yonka niyo eraabareetere kufa. Hati niinyenda ngu eki mukireebe gye n'ahabw'ekyo ninza kugaruka nkwa eky'okworekyeraho kyaitu ekyo muhara wa Yezebeeli naashwerwa omu nju ya Yuda kandi omu buryo obwo naagitaahiza kimwe omu kuramya ebishushani reero kikatuma Ruhanga yaahayo Abayuda omu kufa. Ekyo nikyo Balamu yaakozire, nawe. Mbweni Yezebeeli ngugu hanu n'obupagaani bwe. Orubaju ruri hariyo Abayuda nibaramya Ruhanga nk'oku bashemereire kandi nibatungwa Ekigambo. N'ahabw'ekyo Yezebeeli yaahingira muhara wa Yehoraamu. Edakiika ei ekyo kyabaireho, Yehoraamu akareetera abantu kuramya ebishushani. Edakiika ei obwo bushwere bwabaho Abayuda nibwo yaafa. Okufa omu mwoyo kwataahamu. Edakiika ei ekanisa y'okubanza ya Rooma yaayekoziremu ekibiina ky'ediini, ekafa. Edakiika ei aba Luteeri baayekoziremu ekibiina ky'ediini, rufu ekabataahamu kandi baafa. Abapentekoote bakaija aha muheru kandi baayekoramumu ekibiina ky'ediini. Omwoyo akabatsigaho, n'obu baraabe batarikukiiriza. Kwonka Akabatsigaho. Obwo bushwere bukareeta kufa. Bwanyima omushana gw'Obumwe bwa Ruhanga gwaija. Baayekoramumu ekibiina ky'ediini nabo baafa. Reero ahanyima y'omuriro gwa Ruhanga kushuuma aha mugyera Ohio omu gwa 1933 okusisiimuka kw'okutamba kukabuga ensi, kwonka tikwarabire omu kibiina ky'ediini kyona. Ruhanga akaza aheeru y'ebibiina by'Abapentekoote, aheeru y'ebibiina by'amadiini, kandi eki Arikuzi kukora omu biro by'omu maisho nikiza kuba aheeru y'ekibiina ky'ediini, naky. Ruhanga takaabaasa kukorera omu bafiire. Naakorera omu bantu ABAHURIIRE bonka. Abo bantu abahuriire bari aheeru ya Babulooni.

Mbweni nooreeba, "Rufu" nari "Ekibiina ky'ediini" kikaija, kandi ekanisa yaafa, nari okukishoboorora gye kukiraho rufu ekaba omutuuzi kandi obwo enyimaho kakye AMAGARA gonka arigo gaabaire nigategyeka. Nk'oku Haawa w'okubanza yaareetsire okufa aha bantu nikwo hati ekibiina ky'ediini kireetsire okufa, ahakuba ekibiina ky'ediini nikizaarwa eby'okutahikiirira bibiri, enkora y'Ekinikolaiti n'enkora ya Balamu, ezirikujanjaazibwa nabikazi Yezebeeli. Hati Haawa akaabaire ashemereire kwokibwa hamwe n'enjoka ahabw'ekikorwa kyabo kibi munonga. Kwonka Adamu akabitaahamu, yaayegarurira Haawa jubajuba nikwo Haawa yaarokorwa. Kwonka ediini egi ya Sitaane ku eraaheze kugyenda orugyendo rwona rw'obusingye bwona, tiharibaho n'omwe oriija kuramura, kandi eryayokibwa hamwe n'owaagibehabeihire, ahakuba maraaya n'abaana be na antikristo na Sitaane boona baryanagwa omu myanya yaabo omu nyanja y'omuriro.

Hanu ninza kwebanza omu maisho kandi obundi eki nshemereire kukibiikira obutumwa bw'obusingye obw'aha muheru, kwonka nikireebeka kihikire okukitaasyamu hati ahabw'okuba nikikwata kurungi munonga aha bibiina by'ediini hamwe n'ebirikuzi kubikorerwamu. Kandi niinyenda kubahabura. Okushuuruurwa 13:1-18, "Kandi naareeba enyamaishwa neetuuhuuka omu nyanja eine amahembe ikumi n'emitwe mushanju; aha mahembe gaayo hariho ebirunga ikumi, n'aha mitwe yaayo hariho eiziina ry'okurogota. Ego nyamaishwa ei naareebire ekaba neeshusha engwe, ebiganja byayo nibishusha eby'edubu, n'akanwa kaayo nikashusha ak'entare. Ekijoka kyagiha amaani gaakyo n'ekitebe ky'obukama bwakyo n'obushoboorozi bwingi. Ogumwe aha mitwe yaayo nooshusha oti gukaba gwine obuhuta obw'okugiita; kwonka obuhuta obwo bukakira; ab'ensi yona baagikurata nibagitangaarira. Kandi baaramya ekijoka ahabw'okuba kikaha egyo nyamaishwa obushoboorozi bwakyo;

baaramya enyamaishwa egyo nibagira bati: N'oha orikushusha enyamaishwa egi? Kandi n'oha owaakubaasa kugirwanisa? Egyo nyamaishwa yaaheebwa akanwa akarikugamba ebigambo by'amaryo n'ebyokurogota; kandi yaikirizibwa kukoresa obushoboorozi bwayo okumara ameezi makumi ana n'abiri. Yaayashamya akanwa kaayo, yaagamba eby'okurogota ahari Ruhanga, neerogota aha Iziina Rye n'aha ihema Rye, nibo abatuura omu iguru. Kandi yaikirizibwa kurwanisa abarikwera n'okubasingura; yaaheebwa n'obushoboorozi aha nganda zoonza n'abantu n'endimi n'amahanga; boona abatuura omu nsi baryagirama, abu amaziina gaabo gatahandikirwe mu Kitabo ky'Amagara eky'Omwana gw'Entaama owaitsirwe okuruga aha kuhangwa kw'ensi. Weena oine okutu ahurire. Omuntu weena ow'okunyagwa aryanyagwa; weena ow'okwitwa na rurara, ashemereire kwitwa na rurara. Aho niho okugumisiriza n'okwikiriza kw'abarikwera kumanyirwa. Kandi naareeba enyamaishwa endiijo neeruga okuzimu omu itaka, eine amahembe abiri nk'ag'omwana gw'entaama, neegamba nk'ekijoka. Neetegyekyesa obushoboorozi bwona obw'enyamaishwa ey'okubanza omu maisho gaayo, neegyema ensi n'abagituuramu kurama enyamaishwa ey'okubanza, eyaakizire obuhuta bw'okugiita. Neekora obumanyiso obukuru, nangwa n'okwiha omuriro omu iguru gukagwa aha nsi omu maisho g'abantu; ahabw'obumanyiso obwo obu yaahairwe kukorera omu maisho g'egyo nyamaishwa, yaabeihebeha abatuura omu nsi, ngu bakore ekishushani ahabw'enyamaishwa egyo eyaahutaaziibwe na rurara, ekanga ekagumaho. Yaikirizibwa kuha ekyo kishushani ky'enyamaishwa omwitsyo, ngu kigambe, kandi kiitise abantu boona abangire kukirama. Kandi abantu boona, abato n'abakuru, abatungi n'abooro, ab'obusingye n'abahuuku, yaabaragiira kuteebwa akamanyiso aha mukono gwa buryo, nari aha buso, ngu hatabaho owaagura nari owaatunda, kureka ogwo oine ako kamanyiso, niryo iziina ry'enyamaishwa, nari enamba y'eiziina ryayo. Okukishoboorokyerwa nikwetenga obwengeye. Orikwetegyereza abare enamba y'enyamaishwa; ahakuba n'enamba y'omuntu; enamba egyo ni magana mukaaga na makumi mukaaga na mukaaga.”

Eshuura egi neeyoreka amaani g'Ekanisa Enkatorika ya Rooma kandi n'eki erikora kurabira omu kibiina ky'ediini. Ijuka ogu n'omuzaabibu gw'ebishuba. Reka egambe Eiziina rya Mukama, neekikora etyo omu kishuba kyonka. Obwebembezi bwayo ti bwa Mukama kureka n'obwa Sitaane. Neehendera erikworekyera kimwe ku eri hamwe n'enyamaishwa. Maraaya otembire enyamaishwa erikutukura nikyoreka butunu ku amaani ge gari aga ruhanga w'okugyema (Sitaane) kwonka atari Ruhanga weitu, Mukama Yesu Kristo.

Omu mushororongo gwa 17, nikyoreka kirikuhamisiriza ku Ekanisa Enkatorika ya Rooma erikwija kutunga obushoboorozi bwona bw'eby'obushuubuzi by'ensi, ahakuba tihariho omuntu orikubaasa kugura nari kuguza atakwataniise nayo. Eki nikiruga omu Kushuuruurwa 18:9-17 ekirikworeka oku erikukora hamwe n'abagabe, abanyiginya, abashuubuzi, boona aba baine akakwate na Rooma n'eby'obushuubuzi.

Omu Kushuuruurwa 13:14, nitwega ngu enyamaishwa neejanjaaza okuturiza kwayo kurabira omu kishushani ekyagikoreirwe. Ekishushani ekikozirwe n'ekibiina ekirikuteerana amakanisa ky'ensi yoonza, omu amakanisa ageekoziremu ebibiina goona garikwija kwegaitira hamwe n'Abakatoriki ba Rooma (bariyo nibakikora na hati.) Nikibaasikira kimwe okwegaita oku kuryaija kwenda kwemereza amaani g'obukomyunisiti. Kwonka obu obukomyunisiti nka Nebukadeneza bwaimukiibwe kwotsya omubiri gwa maraaya, Rooma eryasingurwa kandi ecwekyereziibwe. Yetegyereze ngu hoonza ahu ekanisa y'Ekirooma yaagiire, obukomyunisiti bukagikurata. Nikiteekwa kuba omu muringo ogwo. Kandi ka mbahabure hati, mutatandika kuteekateeka ngu obukomyunisiti niwe muzigu waanyu wenka. Ngaaha sebo. N'Ekanisa Enkaturika, nangwa niyo n'okukiraho.

Hati ka tushome Okushuuruurwa 13:1-4, kandi tugigyerageranise n'Okushuuruurwa 12:1-5, Okushuuruurwa 13:1-4, “Kandi naareeba enyamaishwa neetuuhuuka omu nyanja eine amahembe ikumi n'emitwe mushanju; aha mahembe gaayo hariho ebirunga ikumi, n'aha mitwe yaayo hariho eiziina ry'okurogota. Egyo nyamaishwa ei naareebire ekaba neeshusha engwe, ebiganja byayo nibishusha eby'edubu, n'akanwa kaayo nikashusha ak'entare. Ekijoka kyagiha amaani gaakyo n'ekitebe ky'obukama bwakyo n'obushoboorozi bwingi. Ogumwe aha mitwe yaayo nooshusha oti gukaba gwine obuhuta bw'okugiita; kwonka obuhuta obwo bukakira; ab'ensi yoonza baagikurata nibagitangaarira. Kandi baaramya ekijoka ahabw'okuba kikaha egyo nyamaishwa obushoboorozi bwakyo; baaramya enyamaishwa egyo nibagira bati: N'oha orikushusha enyamaishwa egi? Kandi n'oha owaakubaasa kugirwanisa?” Okushuuruurwa 12:1-5, “Eky'okutangaaza kihango munonga kikareebwa omu iguru, omukazi ajwaire eizooba, n'okwezi kuri ahansi y'ebigyere bye, n'aha mutwe gwe hariho ekirunga ky'enyonyoozi ikumi na ibiri. Omukazi ogwo akaba aine enda; yaarumwa, yaatakibwa ebisha by'okuzaara. Kandi eky'okutangaaza ekindi kyareebwa omu iguru, ekijoka kihango ekirikutukura, ekiine emitwe mushanju n'amahembe ikumi, kandi kiine ebirunga mushanju aha mitwe yaakyo. Omukira gwakyo gwayeyerera ekicweka kya kashatu ky'enyonyoozi z'omu iguru, gwazinaga ahansi. Ekyo kijoka kyayemerera omu maisho g'omukazi owaabaire naayenda kuzaara ngu, ku araheze ati kuzaara, kishonshomere omwana we. Yaazaara omwana w'omwojo oritegyekyesa amahanga goona enkoni y'ekyoma; kwonka omwana ogwo yaashahurwa, yaatwarwa ahari Ruhanga n'aha kitebe ky'obukama Bwe.” Sitaane n'ediini y'obwa Sitaane biri omuri ezi nyamaishwa zombi. Omu Kushuuruurwa 14, enyamaishwa eyaahutaaziibwe obuhuta obw'okugiita kwonka ekagaruka ekaba ehuriire n'obugabe bwa Rooma empagaani obwabaire butegyeka amahanga obwagwire ahabw'okutaahirirwa abazahambuki kandi omu buryo obwo amaani gaabwo g'okutegyeka amahanga gakahwa. Kwonka ekagaruka yaagegarurira omu bwa paapa bwa Rooma. Waakireeba? Eihanga eryategyekire ahabw'okushenyagura goona kandi eryahindikire obugabe oburikukirayo amaani eriramanyirwe, aha muheru rikahutaaziibwe obuhuta obw'okugiita. Amaani gaaryo gakahwa agaabaire nigareebekyerwa omu kutegyekyesa amahe n'ebindi. Kwonka omu butegyeki bwa Konsitantiini rikagaruka ryagira amaani, ahakuba obwa paapa bwa Rooma buherize kushenshera omu nsi yoonza, kandi obushoboorozi bwabwo

tibwine bugarukiro. Obwa paapa bwa Rooma nibukoresa abagabe n'abashuubuzi kandi omu maani gaabwo g'akabi munonga ag'ediini hamwe n'ag'esente nibutegyeka nka ruhanga kazi w'obusingye obu. Nibwo ekijoka ekyayemereire kitegyereize kushonshomera omwana w'omwojo. Heroode akagyezaho kwita Mukama Yesu kwonka yaaremwa. Bwanyima Yesu yaabambwa abaserukare Abarooma, kwonka hati atweirwe aha kitebe ky'obukama.

Hati okugumizamu n'ebi naaheza kugamba, ijuka okworekwa kwa Danieli. Ekicweka ekirikuhereeruka ky'ekishushani, obugabe bw'ensi obw'okuhereeruka bukaba buri omu bigyere. Ekyo kikaba kiri ekyoma n'eibumba. Reebe ekyoma n'obugabe bwa Rooma. Kwonka hati tibukiri kyoma kigumire. Eibumba ribwejwangizemu. Kwonka buriho kandi nibwebembera ebirikukorwa omu nsi omu mahanga againe obugabe bw'okwecweramu n'agarikukirayo kuba ga ngambanyenka. Ekanisa y'Ekirooma eri omuri buri ihanga. Ebyejwangizemu byona.

Ka mbaheho akantu kakye aha kyoma n'eibumba. Nimwijuka obu Khrushchev yaateera engaito ye aha meeza omu rukiiko rw'Amahanga Ageeteeraine? Mpaho, hakaba hariyo amahanga g'oburugwa-izooba ataano n'agandi ataano g'oburengyerwa-izooba. Khrushchev akagambirira ag'oburugwa-izooba na Purezidenti Eisenhower ahabw'ag'oburengyerwa-izooba. Omu rurimi Orurusiya, Khrushchev nirimanyisa eibumba kandi Eisenhower nirimanyisa ekyoma. Abeebembezi babiri abarikukirayo obukuru b'ensi, ebyara bishaija bibiri by'ebigere by'ekyoma n'eibumba, bakaba bahikaine. Turi aha muheru gwabyo byona.

Omu mushororongo gwa 4 nihabuza hati, "N'oha owaakubaasa kurwanisa egi nyamaishwa?" Hati omu bwire obu hariho amaziina gamwe rurangaanwa omu nsi. Hariho amahanga gamwe ag'amaani maingi, kwonka obwa hati Rooma niyo erikuhurirwa. Paapa ari omu ntebe y'omuvugi. Kandi amaani ge nigaza kweyongyera. Tihariho n'omwe orikubaasa kumurwanisa.

Omushororongo gwa 6 "Yaayashamya akanwa kaayo, yaagamba eby'okurogota." (Enyegyesa y'ebi barikwegyesa n'ebiragiyo by'abantu; engangaazi, abarikwekuza, abarikukunda okweshemeza, baine nshusha y'okutiina Ruhanga kwonka bahakanisa amaani Ge). Akarogota aha Iziina rya Ruhanga - naahindura eryo Iziina kurita omu byeterero kandi n'okwanga kukora ekihikire.

Omushororongo gwa 7, "Kandi yaikirizibwa kurwanisa abarikwera." Okuhiigwa - okwitwa kw'abaikiriza b'amazima kandi byona omu Iziina rya Mukama kwenda ngu Eiziina rya Ruhanga rirogotweho, nk'oku kiri omuri Russia, ahabw'ebi Ediini Enkatorika yaakozireyo.

Omushororongo gwa 8, "Boona abatuura omu nsi" (boona abu amaziina gaabo gatahandiikirwe mu Kitabo ky'Amagara eky'Omwana gw'Entaama owaitsirwe okuruga aha kuhangwa kw'ensi) "baryagirama."

Ruhanga asiimwe entaama tizirigirama. Buri muntu aryabeihwabeihwa kureka entoore zo zonka. Kwonka tibaribehwabeihwa. Ahakuba nibahurira eiraka ry'Omuriisa kandi Bamukuratira.

Hati kandi, mureebe eki, eki tutwire nitugyezaho kubooreka. Egi mbibo ya rufu eyaatandikiire omu busingye bw'okubanza - egi mbibo y'ekibiina ky'ediini, aha muheru gwa byona ekuzire yaaba omuti omu buri nyonyi mbi yoono erikutaaha. N'obu eraabe neeyegambaho ngu niyo erikuha amagara, nehereza rufu. Ebijuma byayo ni RUFU. Abo abarikugiryaho bafiire. Egi ntwaza y'amaani maingi y'ekanisa ebugire omu nsi nebeihabeihwa ensi ngu omuriyo harimu okujunwa kw'omubiri n'okw'omwoyo nebeihwa kandi ecwekyereza omutwe gw'abantu baingi. Kwonka ti rufu ei erikujwekyera yonka, kureka ekintu eki ekifiire kyo kyonka kiriyaitwa rufu niyo nyanja y'omuriro. Oo, kuri abantu nibamanya omuheru gwabo oku guriba ahabw'okugigumamu. "Mugirugyemu, mbwenu nimwendera ki kufa?"

OKURABURA OKURIKUSHEMBAYO

Okushuuruurwa 2:23, "Kandi n'abaana be Ndyabaita rufu; amakanisa goona garyamanya ngu Niinye ocaaka emitima n'emyoyo; kandi Ndyazimuurira omuntu weena omuriimwe ebishemereire ebi yaakozire."

Ruhanga areeba omutima. Ekyo tikikahindukahoga. Kandi tikirihinduka. Hanu, kandi n'omu busingye bwona hariho ebibiina by'abantu bibiri, byombi nibigamba ku okushuuruurirwa kwabyo kuruga ahari Ruhanga kandi ku biine obuzaare na Ruhanga. "Kwonka omusingi gwa Ruhanga oguhamire guriho, gwine akamanyiso aka ngu, Mukama naamanya Abe." 2 Timoseo 2:19. "Mukama acaaka emyoyo." Ekigambo "okucaaka" nikimanyisa "okurondooza" nari "okukuratirira." Ruhanga naarondooza ebiteekateeko byaitu (emyoyo); Naamanya ebiri omu mitima yaitu. Naareeba emirimo yaitu ariyo okweyoreka okuhikire kw'ekiri omuriitwe. Omu mutima nimwo haruga okuhikiirira nari okutahikiirira. Omuzimbwe gwaitu, ebigyendererwa byaitu - byona Naabimanya obwo Arikureeba buri kikorwa. Kandi buri kikorwa, buri kigambo kiryacwerwa orubanja obu okushoboorora eby'amagara gaitu kuriheebwayo. Hakaba hatarimu kutiina Ruhanga omu maisho g'omuzaabibu gw'ebishuba kandi baryaheebwa ekifubiro ky'amaani. Ka boona abarikugamba Eiziina Rye, batuure batyo nk'oku kishemereire abarikwera. Nitubaasa kubeihwa abantu kwonka titurikubaasa kubeihwa Mukama.

OKURAGANISIBWA OMU BIRO EBYO BY'OMWIRIMA

Okushuuruurwa 2:24-25. "Kwonka imwe ab'omuri Suatira abatsigaire mutaikiriize nyegyesa egyo,

abatarikumanya bi abandi beeta enaama za Sitaane, nimbagambira ku Ntarikubakorera gundi mutwaro; kwonka muhamye eki mwine okuhitsya obu Ndiija.” Hati tutakagiire omu kuraganisibwa ka ngarukye nyorekye ku ekanisa erikugambwaho Omwoyo omu kitabo eki eine emizaabibu ebiri amataagi gaayo agashobenkaine nigo ekozirwemu. “Kwonka imwe ab'omuri Suatira abatsigaire mutaikiriize nyegyesa egyo.” Nkikyo aho. Naagambira ebibiina bibiri, kimwe kiine enyegyesa, ekindi tikigiine. Mbibyo aho, bitaataaniire hoona byabuga amahanga kimwe nikihakanisa enyegyesa ey'ekindi. Kimwe n'ekya Ruhanga, nikimanya enaama Ze, ekindi n'ekya Sitaane, nikimanya enaama za Sitaane.

“Tindibakorera gundi mutwaro.” Ekigambo omutwaro nikimanyisa oburemeezi nari okunyigwa. Okunyigwa kw'omu Busingye bw'Omwirima kukaba kuri gondama, nari ohendekye. Inama nainga ofe. Ekaba eri inquisition (kooti y'ebiragiyo eyaatairweho paapa wa Rooma kucwa emishango kandi n'okufubira abo abaabaire batarikwikirizana n'enyikiriza z'Ekeleziya), amaani g'obugabe nigashagika endamya ya Sitaane. Yekoremu ekibiina ky'ediini nari oitwe. Buri busingye bukaba bwine ebirikubunyiga. Eky'okureeberaho omutwaro muhango gw'obusingye bw'aha muheru n'okunyigwa kw'obutungi, amagara g'okujarama n'okuhahaara okurimu kwekanga omu busingye obugumire obu turikushusha nkabatashemereire kubutuuramu. Obusingye obu bwa kana nibureebeka nk'obwabaire bwine omutwaro ogushooborokire gye. Gukaba guri okujeemera Rooma, n'okwemererera Ekigambo kuhitsya n'aha kufa.

“Abatarikumanya bi abandi beeta enaama za Sitaane.” Nikireebeka ngu omushororongo ogu abakugu omu kushooborora ebya Baiburi bakagureka ahakuba bakaba batarikubaasa kwetegyereza enyegyesa nari obumanyi obu ebigambo ebi birikumanyisa. Buzima kyanguhi kumanya ebigambo ebi eki birikumanyisa. Ka tubanze tumanye eki abandi beeta enaama za Ruhanga, reero orubaju orundi nirwija kuba ruri ebi abandi beeta enaama za Sitaane. Omu Baefeso 3:16. “Nimmushaba ku Abaha okugumibwa n'amaani ahabw'Omwoyo We omu muntu ow'omunda, nk'obutungi bw'ekitiinisa Kye oku buri; ngu Kristo abone kutuura omu mitima yaanyu ahabw'okwikiriza; ku muraheze kutsimba emizi omuri rukundo, mwahamiramu, mugire amaani ag'okugishoborokyerwa hamwe n'abarikwera boona, mumanye oburaingwa bwayo obw'obukiika, n'obw'oburaingwa, n'obwa bwemi, n'obwa bucuzi, n'okumanyira kimwe okukunda kwa Kristo okurengire munonga okumanya kw'abantu, mubone kwijuzibwa n'okwijura kwona okwa Ruhanga.” Hati kurugiirira aha mishororongo egi, omuntu ku amanya enaama za Ruhanga omu magara ge, n'ekintu ky'amazima eki omuntu ogwo arikwemanyira ahabw'Omwoyo wa Ruhanga omutwiremu, kandi enteekateeka ye emurikirwa obwengeye n'okumanya Ruhanga kurabira omu Kigambo. Kwonka eki abandi beeta enaama za Sitaane nikija kuba ngu Sitaane naija kugyezaho kuhwerekereza eki. Sitaane naija kugyezaho nk'oku atwire naakora kuta ekintu ekindi omu mwanya gw'amazima g'okubaho kwa Ruhanga. Eki naija kukikora ata? Sitaane naija kwihaho okumanya amazima ga Ruhanga - kuhwerekereza Ekigambo ahabw'okutaho ekye ati, “Eego, nikwo Ruhanga agambire?” Obwo naija kuhinganisa Kristo ou tweiniire omu myoyo yaitu. Naija kukikora, nk'oku yaareeteire Abaisraeli kukikora; ahabw'omuntu kutegyeka nk'omugabe omu mwanya gwa Ruhanga. Obumanyi bw'okuzaarwa obwa kabiri nibwija kwangwa hashagikwe eky'okuba memba w'ekanisa. Ebi abandi beeta enaama za Sitaane bakaba babitaahiremu omu busingye obwo. N'ebyana by'ebi abandi beeta enaama za Sitaane ebiri ebishuba, obwitsi n'okuhenda ebiragiyo okurikutiinisa nibyo byazaarukiremu.

EBIHEMBO

Okushuururwa 2:26-29. “Orikusingura, akaguma naakora emirimo Yangye okuhitsya aha muheru, Ndyamuha obutegeyeiki aha mahanga goona, kandi aryabategyeka n'enkoni y'ekyoma, nk'oku omuntu ayatagura enyabya z'eibumba, Nkaanye oku naahairwe Tata obutegeyeiki; kandi Ndyamuha enyonyoozi ey'obusheeshe. Oine amatu, ahurire ebi Omwoyo arikugambira amakanisa.”

“Orikusingura, akaguma naakora emirimo Yangye okuhitsya aha muheru.” Nikyeyorekyera kimwe omu bigambo ebi by'Omwoyo ku Mukama arikugyezaho kworeka Abe enteekateeka Ye aha mirimo y'okuhikiirira. Naagamba aha mirimo emirundi ena. Kandi hati Naagira, ngu ogwo orikuguma naakora emirimo Ye n'obwesigwa okuhitsya aha muheru naija kuheebwa obushooborozi aha mahanga, kandi aryaba omutegeyeiki w'amaani, orikubaasa, otarikugwera rubaju orikubaasa kuraba omu mbeera zoonza n'amaani maingi, okuhitsya obu n'omuzigu orikukirayo obubi arihendagurwa ku kiryaagisa. Okweyoreka kw'obutegeyeiki bwe n'amaani nikwija kuba nk'obw'Omwana. Eki nikitangaaza munonga. Kwonka ka tureebe okuraganisibwa oku omu mushana gw'obusingye obu. Rooma y'amaani neeshagikwa gavumenti, neekoresa abagabe, amahe n'abany'eishengyero, nehendagura kandi esa byona ebiri omu maisho gaayo. Ekaita miriyoni z'abantu kandi eine enjara y'okwita miriyoni ezindi z'abantu abataraje kugiinamira. Eyemeka abagabe nk'oku yaasiima kandi ebagarura ahansi ahu yaabaasiza. Eego, okwetaasya kwayo omu mahanga kigareeteire kugwa buzima ahabw'okuba emaririire kucwekyereza entoore za Ruhanga. Emirimo yaayo n'emirimo ya sitaane, ahakuba eita kandi ebeiha nk'oku sitaane yaakozire. Kwonka eizooba niriija obu Mukama arigira ati, “Mureete abazigu Bangye aba omu maisho Gangye baitwe.” Obwo nibwo abahikiriire bariba na Mukama waabo obu ekiniga ky'okuhikiirira Kwe kirigwa aha barikurogota. Abahikiriire abarikwija Nawe omu kitiinisa, baryacwekyereza abo abaacwekyereize ensi kandi bakakora kubi abarikwera ba Ruhanga. Obu bukaba buri obusingye bw'okuhindura omushaya, obw'enaku nyingi munonga; kwonka eizooba niriija obu amazima garisingura, kwonka n'oha oryemerera omu muriro gwago akakira? N'abacungwirwe bonka ba Mukama.

“Kandi Ndyamuha enyonyoozi ey'obusheeshe.” Okurugiirira aha Kushuururwa 22:16, na 2 Petero 1:19,

Yesu niwe Nyonyoozi y'Obusheeshe. “Niinye kitsitsa kya Daudi, kandi omwijukuru, Enyonyoozi y'omu Kasheeshe erikumurinkana.” “Okuhitsya obu buritagurikana, n'enyonyoozi ey'omu kasheeshe ekaaka omu mitima yaanyu.” N'ahabw'ekyo, Omwoyo naaraganisa entoore z'omu Busingye bw'Omwirima Arikwegambaho kandi n'omu busingye obw'omu maisho.

Nk'oku twamara kugamba, Yesu We wenka naayeyoreka n'entumwa ya buri busingye. Nizaakiira kuruga Ahariwe okushuururirwa kw'Ekigambo ekya buri busingye. Ekigambo eki ekishuurwirwe nikiihayo entoore za Ruhanga omu nsi kandi kizitaasya omu kwegaita kwijwire na Yesu Kristo. Entumwa ezi nizeetwa enyonyoozi ahabw'okuba nizimurinkana n'omushana ogu zitiirize nari ogurukuruga aha Mwana, niwe Yesu. Nizigaruka zeetwa enyonyoozi ahabw'okuba nizo “zirikuba ziine omushana” nyekiro. N'ahabw'ekyo omu mwirima gw'ekibi, entumwa zireeta omushana gwa Ruhanga aha bantu Be.

Obu n'Obusingye bw'Omwirima. N'obw'omwirima okukira munonga ahabw'okuba Ekigambo kya Mukama haihi kyona kisherekirwe abantu. Okumanya Rukira-Boona haihi kuhweire. Rufu esingwire omubaro muhango munonga gw'abaikiriza okuhitsya obu emishorongo yaabo ecwekyereziibwe. Ebintu bya Ruhanga bihwereiremu kimwe amaani n'okuhitsya hati, kandi kikashusha oti Sitaane akaba naija kusingura abantu ba Ruhanga buzima.

Ku haraabe harabaireho abantu abareetengire okuraganisibwa okurikukwata aha nsi etabamu ekiro, bakaba bari abantu b'omu Busingye obu bw'Omwirima. Kandi niyo nshonga erikutuma Omwoyo yaabaraganisa enyonyoozi y'omu busheeshe. Omwoyo naabagambira ngu Enyonyoozi Nkuru, niwe Yesu, Otuura omu mushana ogu omuntu weena atarikubaasa kuhikaho, omu bukama oburijja Naija kubamurikira n'okubaho Kwe wenka. Tarikwija kuba naakoresa enyonyoozi (entumwa) kureeta omushana mu mwirima bundi. Naija kuba ari Yesu, We wenka, naabagambira maisho na maisho obwo Naabagana obukama Bwe nabo.

N'enyonyoozi y'obusheeshe erikureebeka obu omushana gw'eizooba gutandika kwaka. Eizooba ryaitu (Yesu) ku ariija, haryaba hatakiriho kindi kyetengo ky'entumwa; We wenka Aryatureetera obutumwa Bwe bw'okushemererwa; ku Ariba naategyeka obukama Bwe, kandi tutwire omu kubaho Kwe, omushana gw'Ekigambo guryayeyongyera kwaka kandi gweyongyere kwaka aha izooba ryaitu erihikiriire.

Ni kintu ki ekindi eki twakwetenga okukira Yesu We wenka? Tiwe byona, Byona Ebihikiriire?

Oine amatu ahurire ebi Omwoyo arikugambira amakanisa. Amiina. Nikwo batyo, Mukama Ruhanga, ahabw'Omwoyo Waawe, ka tuhurire amazima Gaawe.



www.messagehub.info

Obutumwa obu bukabuurirwa
William Marrion Branham
 “... omu biro by'eiraka ...” Kush 10:7